

清

史

稿

清史稿

列傳六十一

楊雍建

姚締虞

朱宏祚

王鷲

宋榮

陳詵

楊雍建字自西浙江海甯人順治十二年進士授廣東高要知縣時方用兵總督駐高要帥行徵民夫吏慮其逃繫之官解當除夕雍建命徙廊廡撤餽饌界之師中索榕樹枝製繩以燃礮軍吏檄徵語不遜雍建答之總督王國光以是稱雍建方剛特疏荐莅官甫一年擢兵科給事中十六年春世祖幸南苑雍建疏言昨因聖體違和傳諭孟春饗太廟遣官致祭至期皇躬康豫仍親廟祀此敬修祀典之盛心也乃回宮未幾復幸南苑寒威未釋陟歷郊原恐不足以慎起居且古者蒐苗獮狩各有其時設使獸起於前馬逸於後驚屬車之清塵豈能無萬一之慮疏入上甚怒宣雍建入諭以閱兵習武之意雍建奏對不失常度上意亦解時平南王尙可喜靖南王耿繼茂並鎮廣東雍建疏陳廣東害民

之政八委吏太濫雜派太繁里役無定例用夫無定制鹽埠日橫私稅日盈伐薪採木大肆流毒均宜亟爲革除且兩藩並建供億維繁今川貴底定請移一藩鎮撫其地俾粵民甦息上尋命繼茂移鎮福建雍正發之也十七年疏言朋黨之患釀於草野欲塞其源宜嚴禁盟社請飭學臣查禁從之轉吏科給事中聖祖卽位輔臣秉政奏事者入見皆長跪雍正獨立語比退輔臣目之曰此南苑上書諫獵者也自是奏事者見輔臣皆不跪康熙三年彗星見雍正奏言天心仁愛垂象示警乞齋心修省廣求直言詳詢利病並飭內外臣工滌慮洗心共修職業上優旨褒答四年疏言治化未醇由於臣職未盡比者部臣以推諉爲卸責明爲本部應議之事或請咨別部或請飭督撫致一案之處分因一人之口供未到而更待另議一事之行止因一時文卷小誤而重俟行查至地方利弊所關憚於釐正輒云已經題定無庸再議如此則一二胥吏執定例以駁之足矣不知滿漢堂司各官所司爲何事也督撫以蒙蔽爲苟安民苦於差徭而額外之私徵未聞建長策以除積困吏橫於貪暴而有司之掎克不過摘薄

罪以引輕條向日行考滿之法則題報者皆稱職曾無三等以下之劣員平時上彈劾之章則特糾者僅未俸不及道府以上之大吏凡此推諉蒙蔽之習請嚴飭內外臣工各圖報稱儻仍蹈故轍立予罷斥以儆官常疏入報聞尋自刑科都給事中累擢左副都御史十八年典會試授貴州巡撫疏請立營制減徭役招集流亡禁革私派土司謁巡撫故事必鳴鼓角交戟於門俾拜其下雍正悉屏去引至座前問疾苦予以酒食土司咸輸服始貴陽斗米值錢五千雍正請轉餉以給既令民糶荒芽教以耕種比三年稻田日闢民食以裕二十三年召授兵部侍郎尋以親老乞終養許之四十三年卒賜祭葬子中訥進士官右中允

姚絺虞字歷升湖廣黃陂人順治十五年進士授四川成都府推官四川殘民多聚爲盜互告訐釀大獄絺虞平恕讞鞫輒得其情審釋叛案株連獄囚十七人總督苗澄巡撫張德地薦廉能舉卓異會裁缺改陝西安化知縣行取康熙十五年授禮科給事中疏請嚴選庶吉士考覈翰林報聞十七年典試江西還

奏江西被賊殘破州縣在丁缺田荒案內者請敕督撫酌量輕重限三年或五年勸墾以漸升科全省逋賦二百二十萬歷年追比僅報完三萬此二百十餘萬雖敲骨吸髓勢必不能復完請早予蠲免俾小民得免死亡十八年地震求言締虞上疏曰科道乃朝廷耳目之官原期知無不言有聞則告自故憲臣艾元徵請禁風聞條奏自此言路氣靡中外多所顧忌臣請皇上省覽世祖朝諸臣奏議如何奏謬今者相率以條陳爲事輕熟成風蓋平時無以作其敢言之氣一旦欲其慷慨直陳難矣乞敕廷臣會議嗣後有矢志忠誠指斥奸佞者即少差謬亦賜矜全如或快意讐受人指使章奏鈔傳衆目難掩縱令彈劾得實亦難免於徇私之罪如此則言官有所顧忌不敢妄言中外諸臣有所顧忌不敢妄爲疏下九卿科道會議越日召廷臣等集中左門上問締虞疏如何定議吏部尙書郝維訥等暨給事中李宗孔等俱言風聞之例不宜復開上問締虞爾意如何締虞對曰皇上明聖從未認罪言官但有處分條例在言官皆生畏懼上曰如汝言條例便當廢耶締虞對曰科條雖設當辨公私誠僞上意稍

解諭言官宜敷陳國家大事如有大奸大貪糾劾得實法在必行決不姑貸且魏象樞彈奏程汝璞亦是風聞已鞫問得實原未嘗有風聞之禁也上宣緝虞前指內閣所呈世祖時章奏示之曰汝以朕爲未聞此乎緝虞對曰惟久經聖覽臣故不憚盡言上命以所言宣付史館次日復命緝虞入起居注授筆札記之尋轉工科掌印給事中上考察科道黜孫緒極傅廷俊和鹽鼎三人而嘉緝虞與王曰溫李迥稱職二十一年疏諭外吏積習視事偷惰公務沉閣文移遲緩僚屬宴會游客酬酢廢時糜費請敕部禁飭累擢左僉都御史二十四年授四川巡撫緝虞先爲推官有聲百姓喜其來緝虞至榜上諭於廳事嚴約束禁私徵雜派杜絕餽遺風吏憚之疏言四川迭經兵火荒殘已極官戶鄉紳多流寓外省雖令子弟復業迨入學鄉舉登仕版後仍棄本籍他往百姓見其如此亦裹足不歸若招回鄉宦一家可抵百姓數戶紳宦既歸百姓亦不招而自至今察明各屬流寓外省紳衿請敕部移行飭令復業從之蜀人困於採木緝虞陛辭首陳其害會松威道王駕入覲亦舉是以奏詔特免之復請免連白蠟停

解鍛稅皆獲施行二十七年卒官賜祭葬

朱宏祚字徽蔭山東高唐人昌祚弟宏祚自舉人授江南盱眙知縣有惠政舉卓異康熙十四年行取御史以昌祚子紱官大理寺卿迴避改刑部主事再遷兵部督捕郎中出爲直隸天津道僉事調直隸守道參議三十六年超擢廣東巡撫入見奏對稱旨賜帑金千及內廐鞍馬過庾嶺察知夫役苦累首禁革之復牒兵部凡使者過境有驛站供億不得更有所役廣東軍興後無藝之徵浮於正供悉能免劾墨吏尤者數人餘悉奉法鹽法爲藩下姦民所亂據引地莫敢譙訶宏祚疏陳整飭鹽政數事如議行高州屬縣吳川瓊州屬縣臨高澄邁戶少田蕪積逋十二萬兩有奇疏請豁免衛所屯田歲輸糧三斗額重多逃亡宏祚言民糧重則每畝八升八合起科今屯田浮三之二非恤兵之道當比例裁減事皆允行逆亂方定姦民告訐無已疏請嚴安首株連之例略謂當定南分鎮聞風投冒倚藉聲勢者實繁有徒迨經平定藩下人應歸旗者悉已簿錄解京籍內無名者釋放爲民嗣有旨藩下官兵奴僕及貿易人等除實係遼東

舊人及價買人外逐一清查發出爲民臣尋釋詔意原以諸人皆朝廷赤子不忍株累且十餘年來或補伍或歸農或死亡遷徙無籍可稽乃姦宄之徒蔓引株連或在部呈首或向有司告訐及事白省釋而官民之被累已深請救部嚴議從之三十二年擢福建浙江總督值大討宏祚疏言福建地瘠民飢上責宏祚失言謂賢才不擇地而生四川巡撫張德地署延綏巡撫言延綏邊地無可舉博學鴻詞者少詹事邵遠平奏南方人輕浮不可用朕心甚不愜因皆罷斥今宏祚又以謬言陳奏下部議降調二十九年命修高家堰河工病卒子絳官至廣東布政使綱初授兵部主事累官湖南布政使雍正間擢雲南巡撫疏劾署巡撫楊名時徇隱廢弛藩庫借支未清款項至十九萬有奇名時坐是得罪尋調撫福建卒諡勤恪

王駕字辰嶽山東福山人順治十二年進士授戶部主事康熙五年典試廣東歷刑部郎中十九年出爲四川松威道時征雲南駕督運軍糧覆舟墜馬屢經險阻師賴以濟二十四年壘溪大定堡山後生番出掠巡撫韓世琦檄兵追剿



令駕駐茂州與總兵高鼎議勦撫駕赴堡開諭番族據巴豬寨陽就撫負隅如故駕招撫附近諸寨遣兵自廟山進圍寨斬獲無算追至黑水江賊渠挖子被焚死山後番衆悉降調直隸口北道未行時以太和殿工命採蜀中柁木駕入覲疏言四川大半環山巖巖惟成都稍平衍巨材所生必於深林窮壑人跡罕到斧斤難施所以久存民夫入山採木足抵履穿攀藤側立施工既難而運路自山抵江或百餘里或七八十里深澗急灘溪流紆折經時歷月始至其地木在溪間必待暴水而出故陸運必於春冬水運必於夏秋非可一徑而行計日而至其艱如此且四川禍變相踵荒煙百里臣當年運糧行間滿目瘡痍自蕩平以後休養生息然計通省戶口仍不過一萬八千餘丁不及他省一縣之衆就中抽撥五千入山採木衣糧器具盈千累百遣發民夫遠至千里近亦數百里耕作全廢國賦何徵請敕下撫臣親詣採柁處察勘量材取用其必不能採運者奏請上裁疏入上諭曰四川屢經兵火困苦已極採木累民塞外松木取充殿材足支數百年何必柁木令免採運未幾吏部循例疏請司道內擢京堂

駕未與特命內升尋授光祿寺少卿累遷太常寺卿二十六年授江西巡撫陞  
辭上諭曰大吏以操守爲要大法則小廉百姓蒙福駕對曰臣向在四川不取  
民間粒米束草日費取給於家上曰身爲大臣日費必取給於家勢有所不能  
但操守廉潔念念愛民便爲良吏且亦須安靜貪汚屬吏先當訓誡不悛則糾  
劾瀕行賜帑金千二十七年擢閩浙總督疏言江西白蕩平後積年蠲免銀米  
二百萬有奇民生漸裕然徵收之弊尙爲民累錢糧明加火耗暗加重賦部院  
司道府皆有解費臣入境之初火耗已減解費尙存卽揭示剔除積弊盡革官  
役上下大小雜費南昌新建二縣漕糧尙仍民兌俱行革除漕運積年陋規搜  
剔無遺但在民則省費在官則失利恐臣去後空言無用乞天語嚴禁不致前  
弊復生下所司知之時湖廣叛卒夏逢龍據武昌陷黃州駕次邵武聞警恐憂  
及江西奏撥福建兵協勦自海禁既弛姦民雜入商販出洋劫掠既上官卽  
檄溫州總兵將懋助黃巖總兵林本植定海總兵董大本以舟師出洋搜捕懋  
助本植得賊舟七大本於白沙灣獲巨艦一斬盜渠楊仕玉等十六輩釋被擄

難民百十一人二十八年上幸浙江賜隴御用冠服諭曰爾任總督實心任事浙閩黎庶稱爾清廉故特加優賚未幾召拜戶部尙書以老病累疏乞休詔輒慰留三十三年召大學士九卿及河督于成龍入對上責成龍排陷靳輔並及隴與左都御史董訥內閣學士李應薦附和成龍隴等具疏引罪訥應薦並奪官隴原品休致三十四年卒於家賜祭葬

宋榮字牧仲河南商邱人權子順治四年榮年十四應詔以大臣子列侍衛逾歲試授通判康熙三年授湖廣黃州通判以母憂去十六年授理藩院院判遷刑部員外郎惟嶺關還遷郎中二十二年授直隸通水道二十六年遷山東按察使再遷江蘇布政使察司庫虧三十六萬有奇榮揭報督撫責前布政使劉鼎章欽文分償戶部探銅鑄錢定值斤六分五釐榮以江蘇不產銅探自他省值昂過半牒巡撫田雯疏請停探下部議改視各關例斤一錢二十七年擢江西巡撫湖廣叛卒夏逢龍爲亂徵江西兵赴勦次九江挾餉缺幾譁變榮行次彭澤聞報檄發湖口庫帑充行糧兵乃進至南昌受事舊裁督標兵李美玉袁

大相糾三千餘人謀劫倉庫應逢龍以叛犖調知之捕得美玉大相衆恟恟犖令卽斬以徇諭衆受煽惑者皆貸不問衆乃定江西採竹木饒州供紫竹南康九江供檀栴諸木通省派供貓竹名雖官捐實爲民累犖疏請動支正帑採買上命歲終巡撫視察布政司庫犖疏請糧驛道庫布政使察覈府庫道員察覈漢軍文武官吏受代家屬例當還旗經過州縣點驗取結犖曰是以罪人待之也疏請自贓私斥革並侵挪帑項解部比追外止給到京定限咨文俾示區別皆下部議行三十一年調江甯巡撫蘇州濱海各縣遇颶上元六合諸縣發山水淮揚徐屬縣河溢疏請視被災輕重蠲減如例發江甯鳳陽倉儲米麥散賑別疏請除太湖傍坍地賦額戶部以地逾千畝令詳察犖再疏上陳上特允之犖在江蘇三遇上南巡嘉犖居官安靜迭蒙賞賚以犖年逾七十書福壽字以賜四十四年擢吏部尙書四十七年以老乞罷瀕行賜以詩五十三年詣京師祝聖壽加太子少師復賜以詩還里卒年八十賜祭葬

陳誥字叔大浙江海甯人康熙十一年舉人授中書科中書舍人二十八年考

授吏科給事中乞養歸三十六年起補原官轉刑科掌印給事中疏言淮黃白  
古不兩行邇者修歸仁堤開胡家溝出睢湖之水閉六塘加築高家堰出洪澤  
湖之水此借淮敵黃不易之理然淮水入運者多則敵黃仍弱舊設天妃閘自  
淮黃交會處至清江浦凡爲五閘重運到時更迭啓閉過卽下板鎖斷是以全  
淮注黃其引入運河者不過暫資濟運自改建草壩淮黃盡趨運河清江浦民  
居可危宜復天妃閘舊制使淮易敵黃有裨大工疏下河督張鵬瀚議行尋疏  
劾山東蒲葦知縣俞宏聲以赦前細故拘繫監生王觀成迫令自殺巡撫王國  
昌僅以杖責解役結案玩視民命命侍郎吳涵借說往按宏聲坐奪官國昌等  
議處授鴻臚寺卿再遷左副都御史四十三年授貴州巡撫疏言貴州田地俱  
在層岡峻嶺間土性寒涼收成歉薄人牛種藝維艱前撫臣王彝因合屬田地  
荒蕪十之四五減輕舊則招徠開墾成熟六年後起科有續報者亦如之疏下  
部如所請四十七年調湖北疏劾布政使王毓賢虧帑命解任尋以盤驗已完  
奏免其罪五十年擢工部尙書五十二年調禮部五十八年乞休命致仕六十

一年卒賜祭葬諡清恪子世倌自有傳

論曰當三藩亂時雲貴閩粵其發難地也蹂躪所及湖南北江西四川受害最甚伊闢王繼文撫雲南從師而南參與軍畫其事已別見雍正建於貴州緝虜於四川宏祚於廣東駱於江西肇承駱誥遙繼雍正兵後撫綏甚勤大亂方定起衰救弊出水火登衽席偉哉諸人之功歟

清史稿

列傳六十二

格爾古德

趙士麟

郭世隆

傅臘塔

馬如龍

格爾古德字宜亭鈕祜祿氏滿洲鑲藍旗人自筆帖式授內院副理事官康熙三年從定西將軍圖海平湖廣茅麓山李自成餘部師還遷弘文院侍讀進翰林院侍讀學士充日講起居注官十三年從安親王岳樂討吳三桂三桂將林興珠降上策請分水師泊君山斷常德道泊香爐夾扁山斷長沙衡州道則三桂將坐困安親王令格爾古德馳奏並以興珠語聞上密諭駐岳州諸將議行師還權詹事遷內閣學士二十一年授直隸巡撫上諭之曰金世德于成龍爲巡撫有聲爾承其後得名甚難若急於求名或致債事爾其懷諸直隸旗下莊頭與民雜處倚恃聲勢每爲民害爾其嚴察懲創卽皇莊亦毋寬宥八旗圍地屬於王公大臣者輒置莊設莊頭主徵租遂以病民上深知之故以諭格爾古

德格爾古德尋疏言自鬻投旗之人或作奸犯科冀逃法網或游手好閒規避差徭本主聽其仍居本籍放債牟利則諱旗而稱民窩逃構訟遇官長訪聞又舍民而稱旗詐害良善官不敢問應責成本主止留農戶在莊餘俱收回服役有徇縱者議處下所司飭禁並諭戶部凡鬻身之人先經犯罪投旗冀倖免者與知情之本主並從重治罪時大學士明珠所屬佐領下人戶指圈民間塚地民訴於戶部事下巡撫令宛平縣察勘知縣王養濂言無礙民塚格爾古德疏劾圈佔塚地屬實養濂呈吏讓詔嗣後有如此者嚴懲不貸自康熙初繫拜柄政總督朱昌祚等以圈地獲罪由是無敢訟言其失者至姦民竄入旗下尋仇傾陷狡桀莫能制獨格爾古德承上指執法嚴懲時稱爲鐵面二十三年上幸五臺山格爾古德迎駕詢地方賢吏以靈壽知縣陸隴其對尋疏薦井陘道李基和盧龍知縣衛立鼎與隴其廉能下部擢用頃之以疾乞休優詔慰留會詔廷臣公舉清廉官首以格爾古德列奏上念其羸疾遣御醫診視未幾卒賜卹加等諡文清格爾古德清介布衣疏食卻餽遺纖毫不以自汚上嘗責漕運總



督碩幹居官無狀碩幹言臣爲衆所忌故未能致聲譽上曰格爾古德爲巡撫沒後人猶思慕稱頌居官苟善豈有不致聲譽者爲上所重如此祀直隸名宦金世德字孟求漢軍正黃旗人兵部侍郎維城子淹貫經史精國書以廕生授內院博士累擢左副都御史康熙七年授直隸巡撫是時尙循明制直隸不置兩司世德請設守道理錢穀巡道理刑名如外省布政按察二司由是始有專司畿北諸郡旗民雜處易於容奸請立屯長以治之唐縣等三十七州縣田一千六百餘頃河流沙擁民不能耕歲輸銀二萬有奇穀豆三百九十石歷年貴原戶納賦爲民害世德爲奏請除額地震通州等九州縣復請賑卹並蠲免錢糧皆如所請行師南征億繁愈世德單騎行營中躬料芻糗軍無橫索吏無侵漁市肆晏然十九年卒諡清惠

趙士麟字麟伯雲南河陽人康熙三年進士授貴州平遠推官改直隸容城知縣緝盜衛民創正學書院與諸生講學行取授吏部主事歷郎中擢光祿寺少卿三遷至左副都御史疏請臺灣改郡縣比內地設總兵鎮守省沿海之戍卒

詔報可二十三年授浙江巡撫杭州民貸於駐防旗兵名爲印子錢取息重至  
鬻妻孥賣田舍不償則鬩於官營兵馬化龍殿官成大獄士麟移會將軍掣繳  
券約捐資代償將軍令減子歸母母復減十之六事遂解民大稱頌詔裁浙江  
總督總督駐衢州督標兵三千被汰乏食譁掠民罷市士麟仍濟以饑因奏設  
副將一定額兵八百餘留撥各營缺額衆乃定浙中豪右衙蠹驕悍不法爲民  
害士麟廉得其狀悉寘之法強暴斂跡省城河道久淤督役疏濬牛載訖工民  
以爲便復繕城隍修學校親莅書院與諸生講論經史及濂洛關閩之學士風  
大振禁革規費積弊一清二十五年移撫江蘇浙人懷之繪圖以志去思并於  
西湖敬一書院肖象祀之尋召爲兵部督捕侍郎調吏部皆能舉其職三十七  
年卒祀浙江名宦士麟潛心正學以朱子爲歸躬行實踐施於政事士憇民恬  
所至皆有聲績

郭世隆字昌伯漢軍鑲紅旗人父洪臣原籍汾州順治二年英親王阿濟格下  
九江洪臣隨明將左夢庚來降入旗授佐領分轄降衆累官湖廣道州總兵康

熙四年世隆襲管佐領授禮部員外郎改御史二十七年盛京福陵守兵訴其兄冤死命世隆往按得誣良刑信自縊狀原審侍郎阿禮瑚等坐失實奪官頃之超擢內閣學士聖祖謁孝陵經通州山西禮縣民訴知縣萬世緯及知府紀元婪索狀命世隆會督撫按治世緯坐貪婪科派杖斃無罪人元坐受賕薦世緯卓異皆論死二十九年代于成龍爲直隸巡撫先是罷任安溪知縣孫鏞告福建巡撫張仲舉布政使張永茂侵蝕庫帑遣郎中吳爾泰會總督勘訊至卽拘訊知府六人連引州縣官數十人上聞疑之命世隆往按發仲舉與前布政使張汧竄改賦冊侵隱已徵額銀捏作民欠又汧遠湖廣巡撫虧福建庫帑三十餘萬仲舉前任湖南布政亦虧帑相約互抵嗣仲舉聞汧以贓敗而福建庫尙未完飭屬代爲彌縫左證悉合仲舉永茂俱論罪如律世隆之任帝諭曰于成龍居官甚善繼之不易爾當勤慎任事順天保定眞定永平諸府早世隆奉命履勘疏言被災者七十四州縣請蠲本年及來年額賦新文安等十四州縣災尤重請治賑迭疏籌積貯並以奉天歲豐請飭山海關暫聽民間轉糶仍限

肩挑馱負不得以大車裝載皆如所請又疏言真定地當衝要所屬贊皇縣西有大峪曰子午套素爲盜藪請移繁荊關副將駐真定調馬步兵二千分防霸州子牙河決淹沒田畝請修築大城等縣隄岸並潘王家口黑龍港諸支流壅塞者皆報可三十四年擢閩浙總督歲歉率閉糴居奇世隆疏請蠲賦并發帑二十萬乞糴江浙海運平糶詔俞之先是浙省奏請鼓鑄官吏射利請減其分數由是私鑄者衆每錢不及七八分壅滯不行三十八年上南巡世隆迎駕至杭州民擁輿赴訴乃停官鑄發帑收毀私錢錢得流布上聞爲褒美郵縣沿海田被水衝決一千七十餘畝請永免額賦四十一年調兩廣總督廣東海疆二千餘里守汛遼闊盜賊出沒無常世隆疏定營制增設兵船巡哨迭擊敗海盜沈其舟四十五疏報禽海陽巨盜蔡主也等五人上遣刑部侍郎常綬往勘因議世隆平時禁賊不嚴盜發朦朧掩飾坐奪官四十六年起湖廣總督疏陳防守紅苗請沿邊安設塘汛禁內地民與苗往來並勿與爲婚姻未幾召爲刑部尙書五十年以山西流匪陳四等潛入湖廣鳩黨劫掠世隆前任總督坐失察

奪官五十二年萬壽復原品居三年卒直隸福建浙江兩廣湖廣皆祀名宦  
傅臘塔伊爾根覺羅氏滿洲鑲黃旗人自筆帖式授內閣中書遷侍讀康熙十  
九年授山東道御史有聲臺中二十五年出爲陝西布政使二十六年擢左副  
都御史遷工部侍郎二十七年借侍郎多奇往雲南按提督萬正色與總兵王  
珍互訐事讞實正色珍俱論罪有差調吏部授兩江總督陛辭上諭曰爾當潔  
己奉公督兩江無如于成龍者爾效之可矣傅臘塔至官清弊政斥貪墨讞獄  
尤明慎贛縣民訴知縣劉瀚芳私徵銀米十餘萬並蠹役不法傅臘塔因劾布  
政使多宏安按察使吳延貴贛南道鍾有德於吏役婪贓不速勘復從輕擬曲  
爲庇護宏安延貴有德並坐罷二十八年上南巡閱運河命傅臘塔會河道總  
督王新命勘儀真河閘疏言閘外爲北新洲北新洲外又有漲沙平鋪江中應  
疏北新洲支河直通四閘糧艘循漲沙尾入新河口可以通行別疏言江寧應  
稅累民內輪房稅外輪廊鈔更外輪棚租請予蠲免皆如所請二十九年准徐  
饒發常平倉穀振恤災民賴焉蘆洲丈量例委佐貳民苦需索傅臘塔定五年

一行悉以印官理其事歷年通賦量爲帶徵由是積困頓甦是年監臨江南鄉試疏稱士子懸試者萬有餘人請廣科舉額下部議增廣額四十名疏劾大學士徐元文原任尙書徐乾學縱子弟招權罔利巡撫洪之傑徇私袒庇詔毋深究予元文休致沭陽民周廷鑑叩閭訟降調侍郎胡簡敬居鄉不法並及之傑瞻徇狀命傅臘塔按治得實簡敬及其子弟並治罪之傑奪官三十二年廣東巡撫江有良與巡鹽太常少卿沙拜互訐傅臘塔往按有良沙拜並坐受賄奪官三十三年疏言淮揚所屬多版荒巡撫宋犖曾請緩征格於部議臣履畝詳勘鹽城高郵等州縣因遇水災業戶逃亡者衆今田有涸出之名人無耕種之實小民積困熟田額糧尙多懸欠何能代償盈萬之荒賦請恩賜蠲除庶逃戶懷歸安居樂業疏入下部議不許上特命免徵旋卒於官上聞諭廷臣曰傅臘塔利而不流不畏權勢愛惜軍民兩江總督居官善者于成龍而後惟傅臘塔遣太僕寺卿楊舒赴江寧致祭贈太子太保諡清端子騎都尉世職士民懷之爲建祠江寧四十四年上南巡經雨花臺賜祠額曰兩江遺愛雍正中入祀賢

良祠

馬如龍字見五陝西綏德州人康熙十一年舉人十四年陝西提督王輔臣據甯羗叛其黨朱龍寇綏德陷之如龍糾鄉勇倚山立寨寇至屢擊卻之輔臣誘以偽劄斬其使會平逆將軍畢力克圖兵至如龍渡河迎呈偽劄並陳賊虛實因率所部爲前鋒克綏德畢力克圖以聞即便宜令攝州事總督哈占亦疏言如龍倡義拒賊狀請優敘十六年授直隸深州知州州民猾而多盜如龍鋤暴安良豪右斂跡州有民殺人而埋其尸四十年矣如龍宿逆旅得白骨問之曰此屋十易主矣繫最初一人至鉤其情得實置諸法昌平有殺人獄不得其主名使如龍按之閱狀則民父子殺於僧寺並及僧五而民居旁二姓皆與民有連問之謝不知使跡之二人相與語曰孰謂馬公察易欺耳執訊之乃服自是民頌如龍能折獄十九年以察出民間隱地敘勞入爲戶部員外郎歷刑部郎中榷浙江北新關稅務二十四年遷杭州知府杭州民貸於旗營息重不能償質及子女如龍請於將軍覈子母以公使錢代償杭州民咸頌如龍二十八年

上南巡聞其治行超擢按察使平反庶獄多所全活海賊楊士玉竄跡島嶼勾土賊胡茂等剽掠商船如龍設策擒之盡殲其首從巡撫張鵬翮以聞二十九年遷布政使屬吏有歲餽悉禁絕之二十九年紹興大水庫儲絀無可救濟如龍檄十一郡合輸米二萬餘石按戶振給告屬吏曰是逾於歲餽多矣三十一年授江西巡撫整飭常平倉春以羨米出貸秋收還倉飭州縣廣積儲備凶荒仿白鹿洞遺法建書院以教士賤溺女之禁疏請罷追轉漕腳耗三十八年入覲賜御書老成清望榜時淮揚薦饑如龍以江西連歲豐稔率僚屬捐米十萬振之以老病累疏乞休詔輒慰留四十年卒賜祭葬

論曰守成世爲大臣者以仁心行仁政培養元氣其先務也兵革初息瘡痍未復格爾古德等任封疆之重拊循安輯與民休息政績卓卓在耳目廷褒老成野留遺愛有以哉



清史稿

列傳六十三

石琳

兒子文鼎

徐潮

子杞

貝和諾

子陶其明

博齊

覺羅等

蔣陳錫

子凌 訓

劉蔭樞

晉泰

鄂海

衛既齊

石琳漢軍正白旗人石廷柱第四子初授佐領兼禮部郎中康熙元年出爲山東按察使二年以憂去官尋卽起江南按察使以在山東追入官房地遲延坐降調六年授浙江鹽運使十二年轉湖廣下荆南道康熙十三年襄陽總兵楊來喜副將洪福以南漳叛應吳三桂據房縣保康竹山琳偕總兵劉成龍率師討之撫定各峒寨十五年遷河南按察使禁旅南征牧馬開封富麥秋琳與統兵諸將帥約令兵毋騷擾坐帳中四十餘日及去民得穫麥二十年遷浙江布政使時耿精忠初平衢州被兵尤甚戶口逃亡丁賦皆責之里甲琳覈實請免

之師行供億浩繁民多逋負琳悉爲釐定裁革陋規禁加耗尤嚴嘗曰革一分  
火耗可增一分正供二十三年擢湖北巡撫工部以修建太和殿檄各省採枹  
杉諸木琳言枹產萬山中挽運甚艱請寬其程限部議不許特詔允之二十五  
年調雲南疏言詳覈賦役全書應更改者八事雲南自明初置鎮設衛以田養  
軍曰屯田又有給指揮等官爲俸聽其招佃者曰官田其租入較民賦十數倍  
猶佃民之納租於田主國初吳三桂留鎮以租額爲賦額相沿至今積逋愈多  
官民交困宜改依民賦上則起科雲南鹽井有九以各井行鹽之多寡爲每歲  
徵課之重輕琅井鹽斤徵課六釐白井八釐至黑井則倍明末加徵較明初原  
額不啻數倍今請減黑白二井之課如琅井例開化民田畝科糧二斗六升三  
合較未設府以前加至十倍通省民糧惟河陽最重今當減半與河陽一例元  
江山土改流三桂於額糧外別立名色曰田地講銀曰茶商稅銀曰普洱無耗  
秋米曰浪媽等六寨地租加賦倍征民不堪命應請各減其半通海六寨地糧  
較民賦重幾三倍當改依新定民賦科則磅嘉每糧一石征條編銀四兩有奇

亦爲偏重今既歸南安州附征應與州賦一律每糧一石徵銀一兩四分麗江界連土番古稱荒服三桂叛後割金沙江以內喇普地與蒙番地去而糧存當刪除建水自明時設參將歲派村寨陋規銀三百有奇糧八十餘石三桂遂編入正額當裁革新平之銀場易門之銅廠礦斷山空宜盡豁課稅疏入下所司議刊入全書頒行二十八年擢兩廣總督瓊州總兵吳啟爵奏瓊屬黎地請設州縣築城垣增兵防守命琳勘奏力陳其非要上從之四十一年連州獠作亂遣都統嵩祝等會勦平之琳規畫善後定官吏管轄撥兵移防悉協機宜未幾卒官兄子文晟初授蘄州同知歷雲南開化山西平陽知府康熙三十三年上嘉其居官有聲超擢貴州布政使是歲即遷雲南巡撫爲政務舉大綱雲南屯賦科重民田數倍琳官巡撫時奏減而未議行文晟復疏請特允減舊額十之六安南國王黎維正疏告國內牛羊蝴蝶普園三地爲鄰界土司侵佔乞敕諭歸還會文晟入覲上問文晟奏言此地明時卽內屬非安南地妄言擅奏不宜允乃降詔切責之四十三年調廣東四十四年擢湖廣總督坐劾容美土司田

舜年潛安淫虐非實部議當降調上命留任文晟以疾乞退上諭大學士曰文晟粗鄙若爲土司事而能似未得體今既引疾可允其請能歸五十九年卒

徐潮字青來浙江錢塘人康熙十二年進士選庶吉士授檢討累擢少詹事潮學問淹通在翰林應奉文字多出其手聖祖嘗御門召講易論語數陳明晰爲之傾聽三遷至工部侍郎督理錢局清介不苟隨俗局官冒濫事發潮獨無所連染三十三年典會試以母憂歸服闋起刑部侍郎三十九年授河南巡撫上諭之曰河南火耗最重州縣多虧欠爾當籌畫禁止潮上官令火耗無過一分州縣私派悉皆禁革南陽承解黑鉛衛輝辦兌清米向皆假手胥吏恣爲侵漁潮悉心區畫宿弊悉除開封五府饑疏請漕糧暫徵改折以平市直歸德屬永城虞城夏邑三縣被災地畝至一萬七千餘頃出糶常平義社倉穀借給貧民牛種全活甚衆四十一年上巡幸畿甸問巡撫李光地鄰省督撫賢否光地舉潮對上褒美以潮與光地張鵬翮彭鵬郭琇並稱四十二年上南巡潮迎駕奏安賜冠服及御書榜額其冬西巡復迎駕賞賚有加上念汾渭皆入河議於河

南儲穀遇山陝歲歉自水道移粟便於陸運命潮會陝西山西督撫勘議湖與川陝總督博齊會勘三門砥柱語見博齊傳又別疏言汴水通淮一自中牟東經祥符至宿遷漕塞已久一自中牟東南經尉氏至太和今名賈魯河尙可通流請量加疏濬鄭州北別有支河舊跡尙存若於此建閘使汴與洛通尤爲民便上從之四十三年擢戶部尙書充經筵講官兼翰林院掌院學士教習庶吉士四十四年扈從南巡命赴河南按事時上以高郵寶應諸州縣頻年被水患由洪澤湖無所宣洩宜於高堰二壩築堤束水入河又於下河築堤束水入海會潮按事還上詢河壩形勢因指授方略命往董其役四十五年監修高家堰滾水壩高郵車邏中壩並濬文華寺減河四十六年監修武家壩天然壩蔣家壩及諸隄閘先後畢工四十七年調吏部四十九年以病乞休許以原官致仕五十四年卒賜祭葬潮居官平易不事矯飾所至民咸稱頌乾隆初追謚文敬子本自有傳杞字集功康熙五十一年進士官編修由甘肅布政使巡撫陝西入爲宗人府府丞子休致卒

貝和諾富察氏滿洲正黃旗人濟席哈孫自工部筆帖式授戶部主事歷郎中兼佐領累遷大理寺卿康熙三十五年命往山東經理開河漕運總督桑額奏漕船盡過濟甯較往歲早一月上以遣官經理於漕運使命以爲常邊副都御史擢戶部侍郎三十七年朝鮮歲殺國王李焯乞開市義州中江貿穀詔發三萬石與爲市令貝和諾及侍郎陶岱監視事已焯上表謝八道生靈賴以全活是年授陝西巡撫疏報陝西開事例積貯米麥應存一百七十七萬石有奇今實存僅十七萬上命尙書傅臘塔張鵬翮往按尋疏言長安永壽華陰等糴補三十八萬有奇餘皆欠自捐生請令補完二十九年調四川疏言打箭爐木鴉等處番民一萬九千餘戶歸順請增設安撫使五副使五土百戶四十五以專管轄邊民運茶赴鑪貿易給官引五千六百道定額徵課川省行鹽灌川中江山路崎嶇艱於陸運額運壅滯惟冰江小溪可通水運請增給水引商民交便貝和諾治事精詳尙書張鵬翮按事還於上前亟稱之四十二年召授兵部侍郎四十四年擢雲貴總督捕治富民盜李天極王枝葉等天極廣通諸生與臨

安朱六非造爲符讖枝葉師宗人素無行天極等誘之詭託明桂王孫糾黨謀不軌僭稱文興三年散播印割圖劫掠廣南開化自蒙自竄入會城貝和諾標兵誦得狀誅六人流其餘黨四十九年召拜禮部尙書以太原流匪陳四等六十餘人詭稱赴雲南墜地貝和諾得布政使牒報不察究坐降調授盛京工部侍郎五十七年復召爲禮部尙書以老乞休詔慰留六十年卒官子馬喇襲管佐領兼護軍參領累擢正紅旗滿洲副都統雍正五年西藏阿爾布巴等與貝子康濟甯不睦命馬喇往駐西藏旣阿爾布巴戕害康濟甯後藏頗羅甯率兵報讐執阿爾布巴等遣尙書查郎阿等讞其罪磔之詔頗羅甯總管前後藏事移達賴喇嘛於裏塘七年命馬喇駐裏塘守護賜帑金二千總藏事擢護軍統領還京遷工部尙書坐免十一年復以副都統銜往西藏辦事卒官陶岱瓜爾佳氏滿洲正藍旗人由主事歷戶部郎中累擢吏部侍郎朝鮮告饑乞開市貿穀命陶岱與貝和諾運米給糴御製海述朝鮮記其事三十八年署兩江總督尋授倉場侍郎以漕運遲誤降五秩隨旅行走尋卒

博齊巴雅拉氏滿洲鎮白旗人自護衛授鑾儀使擢鎮白旗都統康熙二十四年授江甯將軍調西安三十五年撫遠大將軍費揚古率師西剿噶爾丹命博齊率滿洲兵自寧夏會師大敗噶爾丹於昭莫多敘功授世職拖沙喇哈番聖祖嘗諭大學士等曰博齊自江甯赴西安軍民攀留泣送直至浦口非有善政何能如此誠可謂將軍矣四十二年上幸西安閱兵諭曰西安官兵皆嫻禮節重和陸尙廉恥且人才壯健騎射精練朕巡幸江南浙江盛京烏喇等處閱兵未有能及之者深可嘉尙賚博齊御用藥鞭弓矢四十二年授四川陝西總督上以山陝屢歲祲欲於河南儲粟備振派黃河挽運慮三門砥柱水急舟不得上命博齊偕山陝河南巡撫會勘尋合疏言三門灘多水激挽運險阻仍以陸運爲便從之四十七年卒賜祭葬覺羅華顯滿洲正紅旗人初授宗人府主事遷戶部理事官康熙三十七年授翰林院侍講學士累遷內閣學士三十九年授甘肅巡撫未上官調陝西四十年擢川陝總督甘肅流民數千人就賑西安華顯與巡撫鄂海出俸爲有司倡集資計口授糧並撥荒地爲業上幸西安閱



兵與博齊鄂海同受賜陝民困重欽華顯飭有司禁私徵屏絕僂遺軍民稱頌十二年卒官加太子太保贈兵部尚書諡文襄祀陝西名宦

蔣陳錫字兩亭江南常熟人父伊康熙十二年進士選庶吉士授御史疏陳民間疾苦繪十二圖以進累官河南提學道副使卒官陳錫康熙二十四年進士授陝西富平知縣歲饑米斛直數千發倉振濟不給斥家資佐之全活甚衆行取擢禮部主事監督海運倉革糶艘篷席例銀邊員外郎河道總督張鵬翮薦佐兩淮河務四十一年授直隸天津道遷河南按察使讞決平恕豫省有老瓜賊爲害行旅陳錫廉得其巢穴悉禽治之四十七年遷山東布政使未幾擢任巡撫疏請緩徵二十三州縣衛被災通賦廣鄉試解額增給買補營馬直免累及所司條陳海防三事言戰船當更番修葺水手當召募熟諳水道之人沿海村莊當舉行團練互相接應並以御史陳汝咸條議海疆弭盜疏請漁舟編甲閩粵烏船不許攜礮械得盜舟火藥軍器必究所從來部議悉從之長蘆巡鹽御史希祿請增東省鹽引臨清關請增設濟甯等五州縣口岸陳錫皆言其不

便並得請五十五年擢雲貴總督祿勸州土酋常應運誘沿江土夷攻卓干寨  
陳錫檄師會勦平之撥兵并駐守其地石羊緒礦廢硎老山空隸額不足疏請  
嗣後硎衰卽止勿制定額領遠至省三十二驛山路崎嶇驛夫苦累下令非有  
符合毋濫應夫馬都統武格將軍噶爾弼率師入西藏以雲南糧運艱難欲自  
四川運糧濟給四川總督年羹堯奏言滇蜀俱進兵蜀糧不足兼供乃命陳錫  
與巡撫甘國璧速運五十九年詔資其籌濟不力誤軍機與國璧並奪職令自  
備資斧運米入藏明年卒於途雍正元年山東巡撫黃炳言陳錫在巡撫任侵  
蝕捐穀羨餘銀二百餘萬部議督迫弟廷錫入陳始末詔減價其牛子漣洞漣  
字檀人進士官編修終太僕寺卿洞字愷思進士歷工部郎中山爲雲南提學  
道西陲用兵命從軍授甘肅涼莊道西徼多卜藏瑪嘉諸部與謝勒蘇額勒布  
兩部逃人倚石門寺爲巢往來劫掠洞料簡精銳會涼州鎮官兵分五路進勦  
轉戰棋子山殲賊之半時羅卜藏丹津進逼西甯復檄兵捍禦羅卜藏丹津遁  
走大將軍年羹堯上其功遷山西按察使進布政使上嘉洞實心供職免其父

追價雍正十年加侍郎銜往肅州經理軍管屯田在事二年闢鎮番柳林湖田十三萬畝得糧三萬石築河堤擴二大渠分濬支渠並建倉儲糧公私饒裕副都御史二格協理軍需劾澗校帑誤公逮治論死下獄追贓總督查郎阿等交章雪其誣澗已病卒

劉蔭樞字喬南陝西韓城人康熙十五年進士授河南蘭陽知縣有政聲行擢取吏科給事中以憂歸服闋除刑科給事中疏言廉吏必節儉邇來居官競尚侈靡不特車馬衣服飲食器用僭制踰等抑且交結奔走餽送資緣棄如泥沙用如流水俸不給則貸於人玷官箴傷國體請敕申斥以厲廉戒貪又疏言京師放債六七當十年不償即行轉票以子爲母數年之間累萬盈千是朝廷職官竟爲債主廝養乞敕嚴立科條照實貸銀數三分起息並下部議行尋調戶科三十六年詔求直言蔭樞疏請肅紀綱覈名實開言路報可三十七年外轉江西贛南道贛俗健訟蔭樞晝夜平決愆妄訴者訟漸稀將吏私徵門稅蔭樞令革之米市有牙課牙人藉以婪索蔭樞以其錢置田徵租代課除民累著

按察使忤總督阿山以讞獄前後獄辭互異劾罷四十二年聖祖西巡蔭樞迎駕潼關上識之召對稱旨復授雲南按察使四十五年遷廣東布政使總督員和諾稱其清廉勤慎士民愛戴雲南布政使缺員請以蔭樞調補上從之蔭樞督濬昆明湖築六河岸牯會夏旱發粟平糶禱於五華山得雨民大悅四十七年擢貴州巡撫貴州苗种雜處號難治蔭樞至絕餽遺省徭役務以安靜爲治疏請廣鄉試解額設南籠廳學以振人文先後請改石阡丹川西堡霽谷平州大華諸土司設流官開驛道自雲南坡至蕉溪二千餘里又疏言貴州錢糧課稅僅十餘萬鄰省歲協餉二十餘萬稍愆期軍士懸額待餉請豫撥二十萬儲布政使庫部議持不可疏三上詔特允之其後紅苗叛餽賴以無絀烏蒙威寧兩土司相讐殺四川巡撫年羹堯遣吏勘問土酋匿不出疏聞命四川雲貴督撫按治蔭樞先至遣使招諭威寧土酋聽命烏蒙土酋亦自縛出就質咸願伏罪釋仇苗以無事五十四年準噶爾策妄阿喇布坦侵哈密詔備兵進討蔭樞累疏請緩師略云小醜不足煩大兵願皇上息怒重內治輕遠略上責其妄奏

命馳驛赴軍前周閱詳議蔭樞抵巴里坤上疏數千言請屯兵哈密以逸待勞旋稱病還甘肅疏乞休殿旨譴讓仍令回巡撫任蔭樞疏報病愈上斥蔭樞令詣軍前即稱病令回任病頓愈情偽顯然命解任詣京師部議阻撓軍務坐校上宥之遣赴喀爾喀種地年已八十二居戌三年釋還復故官六十一年與千叟宴世宗御極召見賜金歸里尋卒年八十七

音泰瓜爾佳氏滿洲鑲紅旗人初爲西安駐防兵康熙十三年副都統佛尼勒討吳三桂將譚宏吳之茂王屏藩等音泰隸麾下師自洪中進克陽平朝天關駐守梅嶺關賊夜劫營音泰力禦中槍折齒得上賞明年佛尼埒攻王輔臣秦州臨壕列圍賊突騎出犯音泰射斃三人賊駭遁復進攻西和屢敗之茂等於盩關岐山堡十七年進攻四川克保密敘州敘功授饒騎校遷防禦三十五年署參領從西安將軍博齊會大將軍費揚古征噶爾丹出西路五月上親征出中路至克魯倫河值積雨運糧滯賊預焚草地我軍紆道秣馬音泰言於博齊曰聖駕親征宜倍道前進乃急趨昭莫多大軍繼進噶爾丹敗遁敘功予雲騎

尉世職四十一年遷佐領四十二年上巡西安令官兵校射音泰蒙賞與賜宴  
尋授協領四十三年擢西安副都統四十四年授西甯總兵官上知其貧詔陝  
西督撫助練兵犒賚之資四十六年諭音泰久居西陲賄習兵事外藩蒙古及  
內地軍民交口稱譽命擢甘肅提督四十八年授川陝總督入覲賞花翎及冠  
服鞍馬並御書攬轡澄清榜賜之四十九年幹偉番蠻羅都等掠甯番衛戕冕  
山營游擊周玉麟命四川巡撫年羹堯借提督岳昇龍往勦羹堯至昇龍已禽  
羅都等三人械送勘問既定讞遂先還昇龍借建昌總兵郝宏勳至會鹽招降  
番蠻諸酋願率衆十萬貢納糧馬音泰請以降酋爲土司分領其衆因勦羹堯  
違旨先還詔奪羹堯職留任效力未幾昇龍以疾解任羹堯知其曾假帑金議  
率屬相俸代償音泰不從羹堯遂入告上允行並諭音泰宜與巡撫和衷尋喪  
其潔清不瞻徇實心任事會奉詔申禁游民越境令嚴勦縱容官吏邠州諸屬  
拘繫者四十餘案每案至數十人音泰疏言諸人皆藉技營生無不法狀應遞  
解原籍編管如縱出境議處所司上睦之以病疏乞休上曰朕前幸西安知音

秦義勇游擢至總督寬嚴並用軍民無不感戴朕甚愛惜之可令在任調攝五十二年復請許解任還京師給第宅田畝以旌其廉並諭羣臣曰朕初用晉秦人不知其善後乃稱朕有知人之明也五十三年卒賜祭葬諡清端初授雲騎尉世職特命世襲罔替

鄂海溫都氏滿洲鎮白旗人自筆帖式授內閣中書歷宗人府郎中兼佐領康熙三十二年聖祖親征噶爾丹命鄂海赴塞夏儲備牲畜陝西按察使員缺上以命鄂海且諭之曰初任外僚每言潔其身以圖報及莅任輒背其言朕於數十從臣中簡爾爲按察使爾當益勵素行也三十七年遷布政使四十年擢巡撫四十九年授湖廣總督鎮筸邊外紅苗爲亂令總兵張谷貞等召苗目宣諭毛都塘等五十二寨盤塘等八十三寨先後薙髮歸化上嘉之五十二年移督川陝疏報甘肅洮岷邊外大山生番請歸化上以洮岷邊外無生番或爲蒙古屬部命詳察鄂海奏大山在洮州東南土司楊汝松界外非蒙古屬部宜令汝松兼轄復疏報四川會川管界外涼山番目阿木咱請歸化歲貢馬請給番目

職銜令轄所屬番民並從之甘肅靖遠固原會審歲歉饑民乏食疏給口糧資  
本撫輯流移五十七年大將軍貝子允禩等率師討策妄阿喇布坦駐兵西甯  
甘州莊浪諸處鄂海請發西安庫帑四十萬並撥平涼鞏昌甯夏倉穀十萬充  
餵以陝西葭州甘肅寧夏等二十八處轉輸軍需請豁丁糧紓民力五十八年  
復請豁甘肅逋欠錢糧草束俾民得盡力輸納本年糧草以佐軍戶部格不行  
特旨允之六十年詔解任專治糧餉以四川巡撫年羹堯代之未幾命往吐魯  
番種地效力雍正元年予原品休致效力如故尋卒

衛既齊字伯嚴山西猗氏人父紹芳字猶箴順治三年進士授河南尉氏知縣  
兵後修復城郭學校勸課廣積儲禁暴戾姦尉氏民頌焉行取兵部主事累  
遷貴州提學道僉事浙江巡海道副使既齊康熙三年進士改庶吉士散館授  
檢討講學志當世之務上疏言時事語懇直會遭祖母喪假歸居久之詣京師  
補官上命以對品調外授直隸霸州州判既齊召民之秀良者曹試而教誨之  
俾各有所成就民貸於旗丁子錢過倍橫索無已既齊力禁戢之無敢逞迭署



固安永清平谷知縣所至輒有惠政巡撫于成龍疏荐會既齊以母憂去繼復遭父喪一日上御門舉既齊諮於九卿僉曰賢命復授檢討二十七年服闋詣京師補官上知既齊講學負清望超擢山東布政使既齊感激益自奮勉爲清廉令府縣輸欵封還平餘門懸鉗吏民白事得自通建歷山書院仿經義治事之例設奎壁二齋課士護巡撫印者再清庶獄結八十餘案株累數百人盡釋去在官三年有聲績三十年授順天府尹疏請按行所部黜陟屬吏賢不肯上以爲無益不許尋擢副都御史聞山陝蝗見平陽以南尤甚疏請賑卹上責其懸揣旋授貴州巡撫紹芳爲提學士民祠焉既齊至貴州謁父祠受事黎平知府張澂副將侯奇嵩報古州高洞苗金滿匿罪人殺吏請發兵進勦既齊疏聞卽遣兵捕治澂奇嵩復報兵至斬苗一千一百一十八人既齊復以聞旋察知澂奇嵩妄報疏實陳請奪澂奇嵩官勘治上責既齊輕率虛妄遣尙書庫勒納內閣學士溫保往按旋命逮既齊至京師上令九卿詰責既齊引罪請死九卿議當斬上命貸之遣戍黑龍江明年赦還家居立社課士斥家資供膏火三十

八年上命承修永定河工三十九年又命督培高家堰卒工次

論曰康熙中葉後天下乂安封疆大吏多尙廉能奉職循理若石琳改賦役徐潮革火耗博濟華顯音泰整飭武備安不忘危皆能舉其職者劉蔭樞志在休民未知應兵之不容已蔣陳錫鄂海又以督餉稽遲蒙譴衛旣齊遭際殊異而不獲以功名終其治行皆有可稱膏澤及於民無深淺遠近要爲不沫矣

清史稿

列傳六十四

于成龍

彭鵬

陳瓚

陳鵬年

施世綸

于成龍字北溟山西永寧人明崇禎間副榜貢生順治十八年謁選授廣西羅城知縣年四十五矣羅城居萬山中盛瘴癘獠獠悍初隸版籍方兵後遍地榛莽縣中居民僅六家無城郭廨舍成龍到官召吏民拊循之申明保甲盜發即時捕治請於上官讞實卽處決民安其居鄰獠歲來殺掠成龍集鄉兵將搗其巢獠懼誓不敢犯羅山境民益得盡力耕耘居羅山七年與民相愛如家人父子牒上官請寬獠役疏饑引建學宮創設養濟院凡所當興罷者次第舉行縣大治總督盧興祖等薦卓異康熙六年遷四川合州知州四川大亂後州中遺民裁百餘正賦僅十五兩而供役繁重成龍請革宿弊招民墾田貸以牛種期月戶增至千遷湖廣黃岡同知駐岐亭岐亭故多盜白晝行劫莫敢誰何成

龍撫其渠彭百齡貫罪令捕盜自贖警察知盜所在僞爲丐者入其巢與雜處十餘日盡得其平時行現狀乃出呼役械諸盜具獄辭駢縛坑之他盜皆遠竄管徵行村堡周訪閭里情僞遇盜及他疑獄輒蹤跡得之民驚服巡撫張朝珍舉卓異康熙十三年署武昌知府吳三桂犯湖南帥方攻岳州檄成龍造浮橋濟師甫成山水發橋圯坐奪官三桂散僞劄遍湖北州縣麻城大冶黃岡黃安諸盜皆倚山結寨應三桂妖人黃金龍匿興寧山中謀內亂劉君孚者嘗爲成龍役善捕盜亦得三桂劄與金龍等結大盜周鐵爪據曹家河以叛朝珍以成龍舊治得民心檄往招撫成龍諷知君孚雖反衆未合猶豫持兩端兼程趨賊砦距十里許止宿榜示自首者免罪來者日千計皆貨之先遣鄉約諭君孚降者待以不死乃策黑羸往從者二張蓋鳴鈺逕入賊舍呼君孚出見叩頭受撫降其衆數千分立區保籍其勇力者督令進討金龍走紙棚河與其渠鄰君申往保山砦成龍禽斬之朝珍以聞請復官即擢黃州知府上允之諸盜何士榮反永寧鄉陳鼎業反陽邏劉啓業反石陂周鐵爪鮑世庸反泉阪各有衆數千

號東山賊遙與湖口寧州諸盜合將趨黃州時諸鎮兵皆從師徇湖南州中吏民裁數百讓退保麻城成龍曰黃州七郡門戶我師屯荆岳轉運取道於此棄此不守荆岳且瓦解誓死不去遂集鄉勇得二千人遣黃岡知縣李經政攻陽邏得鼎業誅之士榮率賊數犯自牧馬崖分兩路來犯成龍遣千總羅登雲以千人當東路而自當西路令千總吳之蘭攻左武舉張尙聖攻右成龍力衝其中堅戰合之蘭中槍死師少却成龍策馬冒矢石巡前顧千總李茂昇曰我死汝歸報巡撫茂昇戰甚力尙聖自右出賊後賊大敗生致士榮檻送朝珍遂進克泉畷凡二十四日東山賊悉平十五年歲饑訛言復起成龍修治赤壁亭榭日與僚吏歡詠其中民心大定會丁繼母憂總督蔡毓榮奏請奪情視事十六年增設江防道駐黃州即以命成龍十七年遷福建按察使時鄭成功迭犯泉漳諸郡民以通海獲罪株連數千人獄成當駢戮成龍白康親王傑書言所連引多平民宜省釋王素重成龍悉從其請遇疑獄輒令訊鞠判決明允獄無淹滯軍中多掠良民子女沒爲奴婢成龍集資贖歸之巡撫吳興祚疏薦廉能第

一遷布政使師駐福建月徵莖夫數萬累民成龍白王罷之十九年擢直隸巡撫莅任戒州縣私加火耗餽遺上官令既行道府劾州縣州縣卽許道府不得餽遺挾嫌疏請嚴定處分下部議行宣化所屬東西二城與懷安蔚州二衛舊有水衝沙壓地千八百頃前政金世德請除糧未行爲民累成龍復疏請從之又以其地夏秋屢被災請治賑別疏劾青縣知縣趙履謙貪墨論如律二十八年入覲召對上褒爲清官第一因問勦撫黃州土賊狀成龍對臣惟宣布上威德未有他能問屬吏中亦有清廉否成龍以知縣謝錫袞同知何如玉羅京對復諭劾趙履謙甚當成龍奏履謙過而不改臣不得已劾之上曰爲政當知大體小聽小察不足尙人貴始終一節爾其勉旃旋賜帑金千親乘良馬一製詩褒龍並命戶部遣官助成龍賑濟宣化等處饑民成龍復疏請緩覈定府屬五縣房租並全獨霸州本年錢糧均報可是年冬乞假喪母優詔許之未幾遷江南江西總督成龍先後疏薦直隸守道董秉忠阜城知縣王燮南路通判陳天棟瀕行復薦通州知州于成龍等會江甯知府缺命卽以通州知州于成龍擢

補成龍至江南進屬吏詰誠之革加派剔積弊治事嘗至達旦好微行察知民間疾苦屬吏賢不肯自奉簡陋日惟以粗糲蔬食自給江南俗侈麗相率易布衣士大夫家爲減輿從毀丹堊婚嫁不用音樂豪猾率家遠避居數月政化大行勢家懼其不利搆蜚語明珠秉政尤與忤二十二年副都御史馬世濟督造漕船還京劾成龍年衰爲中軍副將田萬侯所欺蔽命成龍回奏成龍引咎乞嚴譴詔留任萬侯降調二十三年江蘇巡撫余國柱入爲左都御史安徽巡撫涂國相遼湖廣總督命成龍兼攝兩巡撫事未幾卒於官成龍歷官未嘗携家屬卒時將軍都統及僚吏入視惟笥中綈袍一襲牀頭鹽豉數器而已民罷市聚哭家繪象祀之賜祭葬諡清端內閣學士錫住勘海疆還上詢成龍在官狀錫住奏甚清廉但因輕信或爲屬員欺罔上曰于成龍督江南或言其變更素行及卒後始知其始終廉潔爲百姓所稱殆因素性鯁直不肯挾仇讒害造爲此言耳居官如成龍能有幾耶是年冬上南巡至江甯諭知府于成龍曰爾務效前總督于成龍正直潔清乃爲不負又諭大學士等曰朕博采輿評咸稱于

成龍實天下派吏第一加贈太子太保廕一子入監復製詩褒之雍正中祀賢良祠孫準字子繩自廕生授山東臨清知州有清操舉卓異入爲刑部員外郎遷戶部郎中出爲江南驛鹽道再遷浙江按察使居成龍喪歸起四川布政使康熙四十三年授貴州巡撫飭州縣立義學令土司子弟及苗民俊秀者悉入肄業送督學考試調江蘇歲饑請發帑振濟上元等十五縣及太倉鎮海二衛濱江海田畝被潮汐衝擊多坍沒疏請豁免錢糧詔允行以布政使宜思恭爲總督鳴禮所劾準坐失察罷歸雍正三年復職銜尋卒

彭鵬字奮斯福建莆田人幼慧有與其父仇欲殺鵬走匿得免順治十七年舉鄉試耿精忠叛迫就僞職鵬陽狂示疾椎齒出血堅拒不從事平調選康熙二十三年授三河知縣三河當衝要旗民雜居號難治鵬拊循懲勸不畏強禦有妄稱御前放鷹者至縣索餼牽鵬察其詐繫而鞭之治獄摘發如神鄰縣有疑獄檄鵬往鞫輒白其冤二十七年聖祖巡畿甸召問鵬居官及拒精忠僞命狀賜帑金三百諭曰知爾清正不受民錢以此養爾廉勝民間數萬多矣尋順天



府尹許三禮劾鵬匿報控案命巡撫于成龍察之成龍奏鵬訊無左驗方緝凶非不報也吏議奪官詔鵬級留任嗣以緝盜不獲累被議積至降十三級俱從寬留任二十九年詔舉廉能吏用尙書李天馥薦鵬與邵嗣堯陸隴其趙蒼璧並行取擢爲科道尋乞假歸明年即家起工科給事中三十二年陝西西安鳳翔山西平陽災發帑振之又命運河南米十萬石界陝西散饑民鵬疏論陝西山西河南三省有司不恤民狀語甚切下所司並令鵬指實以聞鵬因奏涇陽知縣劉桂刻扣籽粒猗氏知縣李澍杖殺災民磁州知州陳成郊濫派運費夏邑知縣尙崇震派銀包運南陽知府朱璘曖昧分肥並及聞喜夏縣匿災不報狀詔三省巡撫察審事不皆實鵬例當譴上貫之三十二年疏劾順天鄉試中式舉人李仙涓闕墨刪改過多楊文鐸文謬妄給事中馬士芳磨勘通賄下九卿等察議以鵬奏涉虛因摘疏語有臣言如妄請劈臣頭牛懸國門牛懸順天府學以爲狂妄不敬應奪官命鵬回奏鵬疏言會議諸臣徇試官徐倬彭殿元欺飾反以臣爲妄乞賜罪斥上不問而予倬殿元休致三十三年順天學政侍

郎李光地遭母喪上命在任守制光地乞假九月鵬劾光地貪戀祿位不請終制應將光地解任留京守制上從之會廷臣集議鵬追論楊文鏗文謬妄與廷臣忿爭事聞命解職以原品效力江南河工三十六年召授刑科給事中三十七年出爲貴州按察使三十八年擢廣西巡撫湖廣總督郭琇請除學政積弊給事中慕琛滿晉御史鄭惟孜等亦疏列順天鄉試事上以李光地張鵬翮郭琇與鵬俱清廉命各抒所見鵬疏言琇請嚴督撫處分學政貪贓提問督撫需索陋規視貪贓治罪久有定例請敕榜示律條維孜請令各省監生回籍鄉試九卿慮成均空虛應責成祭酒司業就坐監讀書者講習考課各省學政擇諸生有文行者送入成均何虛空虛琛晉請察封坐號以防換卷臣謂換卷多在入門暗約出號交卷時請嚴稽於此又言文官子弟請皇上親試臣謂當另立考場去取聽睿裁與光地等疏皆下九卿詳議互詳光地等傳時河南巡撫徐潮之任上諭曰爾能如李光地張鵬翮郭琇彭鵬不但爲今之名臣亦足重於後世矣鵬在官省刑布德減稅輕徭廣西舊供魚膠鐵葉非其土物赴廣東採

運鵬疏請免之尋移撫廣東潯行疏言廣西州縣借端私派名曰均平臣到任  
劾罷賀縣荔浦懷集武緣諸貪吏前此諸州縣大者派至三千兩其次一二千  
兩不肖官吏往往先徵均平而後正課甚者均平入己遇事復行苛派其不派  
均平者又取盈於火耗且均平所入費於公者十之二三費於饋遺者十之六  
七欲去舊弊避民困必先養州縣之廉請於徵糧之內明加火耗一分其餘陋  
規槩行禁止疏入下部議謂火耗不可行但嚴禁加派廣西舊未設武科鵬奏  
請行之時與蕭永藻互調上勉永藻效鵬又諭大學士曰彭鵬人才壯健前知  
三河聞有賊卽佩刀乘馬馳捕朕所知也御史王度劾鵬在廣西知布政使  
教化新虧帑不卽糾舉迨離任始奏聞又掩護其半廣西糧道張天覺改徵兵  
米浮銷九十餘萬部勒追完而鵬反以天覺署布政使兵米之案必由藩司審  
詳是直以天覺察天覺也命鵬回奏鵬疏辨並訐度昭上以其辭忿激降旨嚴  
飭廣東因借兵餉改額賦徵銀爲徵米較估報時值浮多戶部屢飭追完鵬至  
官是年歲稔米價低以米計銀少七萬三千有奇疏請令經管各官扣追存庫

並議嗣後漕賦仍依原則徵銀採購兵米其按年應追完之銀實因豐歉不同米價無定乞免重追詔允行鵬視事勤敏遇墨吏糾劾無少徇歲旱步禱日中詣獄虛囚開倉平糶旋得雨民大稱頌四十三年卒官年六十八上深悼惜稱其勤勞賜祭葬尋祀廣東名宦

陳璿字眉川廣東海康人康熙三十三年進士授福建古田知縣古田多山田沿錯賦役輕重不均民逋逃邊徒黠者去爲盜璿請平賦役民以蘇息調臺灣臺灣初隸版圖民驍悍不馴璿興學廣教在縣五年民知禮讓四十二年行取授刑部主事歷郎中出爲四川提學道僉事清介公慎杜絕苞苴上以四川官吏加派厲民詔戒飭特稱璿廉未幾用福建巡撫張伯行薦調臺灣廈門道新學宮建朱子祠於學右以正學厲俗鎮以廉靜番民帖然在官應得公使錢悉屏不取五十三年起擢偏沅巡撫位任劾湘潭知縣王爰溱縱役累民長沙知府薛琳聲徇庇不糾劾降黜有差尋條奏禁加耗除酷刑糶積穀置社倉崇節儉禁餽送先起運興書院飭武備停開採凡十事詔嘉勉諭以躬行實踐勿

驚虛名旋入覲奏言官吏妄取一錢即與百千萬金無異人所以貪取皆爲用不足臣初任知縣卽不至窮若不取一錢亦自足用比退上目之曰此苦行老僧也尋調撫福建上諭廷臣曰朕見瓊察其舉止言論實爲清官瓊生長海濱非世家大族無門生故舊而天下皆稱其清非有實行豈能如此國家得此等人實爲祥瑞宜加優異以厲清操陞辭上問福建有加耗否瓊奏臺灣三縣無之上曰火耗盡禁州縣無以辦公恐別生弊端又曰清官誠善惟以清而不刻爲尙瓊爲治舉大綱不尙煩苛修建考亭書院及建陽尤溪朱子祠疏請御書榜額並允之復疏言防海賊與山賊異山賊嘯聚有所而海賊則出沒靡常臺灣金廈防海賊又與沿海邊境不同沿海邊境患在突犯內境而臺廈患在剽掠海中欲防臺廈海賊當令提標及臺澎水師定期會哨以交旅爲驗商船出海令臺廈兩汛撥哨船護送又令商船連環具結遇賊首尾相救不救以通同行劫論罪下部議以爲繁瑣上踐其言命九卿再議允行是年冬兼攝閩浙總督奉命巡海自齋行糧屏絕供億捐穀應交巡撫公費奏請充餉上曰督撫有

以公費請充餉者朕皆未之允蓋恐准令充餉即同正項錢糧不肖者又於此  
外婪取重爲民累令瑣遇本省需款撥用瑣又請以司庫餘平賞資兵役命遵  
前旨廣東雷州東洋塘堤岸海潮沖激侵損民田瑣奏請修築即移所貯公項  
及俸錢助工費隄岸自是永固鄉人蒙其利五十七年以病乞休詔慰留之未  
幾卒於官遺疏以所貯公項餘銀一萬三千有奇充西師之費命以一萬佐饌  
餘給其子爲葬具尋諭大學士曰陳瑣居官甚優操守極清朕所罕見恐古人  
中亦不多得也追授禮部尙書廕一子入監讀書諡清端瑣服御儉素自奉惟  
草具粗糲居止皆於廳事味爽治事夜分始休在福建置學田增書院學舍聘  
主講人文日盛雍正中入祀賢良祠乾隆初賜其孫子良舉人子恭員外郎官  
至知府

陳鵬年字滄洲湖廣湘潭人康熙三十年進士授浙江西安知縣富兵後戶口  
流亡豪強率佔田自殖鵬年履畝按驗復業者數千戶烈婦徐冤死十年鵬年  
雪其枉得罪人寘諸法禁溺女民感之女欲棄復育者皆以陳爲姓河道總督

張鵬翮薦調赴江南河工授江南山陽知縣遷海州知州四十二年聖祖南巡閱河以山東饑詔截漕四萬石令鵬翮選賢幹吏連兗州分振以鵬年董其事全活數萬人上回鑾召見濟甯舟次賦詩稱旨賜御書尋擢江甯知府四十四年上復南巡總督阿山召屬吏議增地丁耗羨爲巡幸供億鵬年力持不可事得寢阿山嘆之令主辦龍潭行宮侍從徵餽遺悉勿應忌者中以蜚語會致仕大學士張英入對上問江南廉吏舉鵬年復詢居官狀英言吏畏威而不怨民懷德而不玩士式教而不欺廉其末也上意乃釋幸京口閱水師先一日阿山檄鵬年於江干疊石爲步江流急施工困難胥徒惶遽鵬年率士民親運土石詰旦工成顧阿山憾不已疏劾鵬年受鹽典各商年規侵蝕龍江關稅銀又無故枷責關役坐奪職繫江甯獄命桑額張鵬翮與阿山會約江甯民呼號罷市諸生千餘建旛將叩關鵬年嘗就南市樓故址建鄉約講堂月朔宣講聖諭並爲之榜曰天語丁寧南市樓者故狹邪地也因坐以大不敬論大辟上與大學士李光地論阿山居官光地言阿山任事廉幹獨劾陳鵬年犯清議上頷之讖

上鵬年坐奪官免死徵入武英殿修書四十七年復出爲蘇州知府禁革奢俗  
清滯獄聽斷稱神值歲饑疫其周歷村城詢民疾苦請賑貸全活甚衆四十八  
年署布政使巡撫張伯行雅重鵬年事無鉅細倚以裁決總督噶禮與伯行忤  
並忌鵬年已劾布政使宜思恭糧道賈樸因坐鵬年覈報不實吏議奪官遣戍  
黑龍江上寬之命仍來京修書噶禮復密奏鵬年虎邱詩以爲怨望欲文致其  
罪上不報俄噶禮與伯行互訐屢遣大臣按治議奪伯行職上以伯行清廉命  
九卿改議並諭曰噶禮曾奏陳鵬年詩語悖謬宵人伎倆大率如此朕豈受若  
輩欺耶因出其詩畀閣臣共閱五十六年出署霸昌道仍回京修書六十年命  
隨尙書張鵬翮勘山東河南運河時河決武涉縣馬營口自長垣直注張秋命  
河督趙世顯塞之議久不決鵬年疏言黃河老隄衝決八九里大溜直趨溢口  
宜於對岸上流廣武山下別開引河更於決口稍東亦開引河引溜仍歸正河  
乃可堵築奏入稱旨世顯能即命鵬年署河道總督六十一年馬營口既塞復  
決鵬年謂地勢低窪雖有引河流不能暢惟有分疏上下殺其悍怒請於沁黃



交匯對岸王家溝開引河使水東南行入榮澤正河然後隄工可成詔如議行先是馬營決口因桃汛流激難以程工副都御史牛紐奉命閱河奏於上流秦家廠堵築工甫竟而南壩尾旋決一百二十餘丈入馬營東下鵬年與巡撫楊宗義謀合之既北壩尾復潰百餘丈鵬年乃建此議世宗卽位命眞除時南北壩尾合而復潰者四至是以次合龍而馬營口尙未塞鵬年止宿河壩瘦食俱廢寢廢懃雍正元年疾篤遣御醫診視尋卒上聞諭曰鵬年積勞成疾沒於公所聞其家有八旬老母室如懸罄此眞鞠躬盡瘁死而後已之臣褒錫甚至賜帑金二千錫其母封誥視一品例廢子諡恪勤祀河南江甯名宦子樹芝樹萱聖祖時以諸生召見令隨鵬年校書內廷樹芝官至平越知府樹萱官至戶部侍郎

施世綸字文賢漢軍鑲黃旗人琅仲子康熙二十四年以廕生授江南泰州知州世綸廉惠勤民州大治二十七年淮安被水上遣使督隄工從者數十輩騷擾民世綸白其不法者治之湖北兵變官兵赴援出州境世綸具芻糧而使

吏人執梃列而待兵有擾民立捕治兵皆斂手去二十八年以承修京口沙船  
遲誤部議降調總督傅臘塔疏陳世綸清廉公直上允留任撫揚州知府揚州  
民好游蕩世綸力禁之俗爲變三十年八月海潮驟漲泰州范公隄圯世綸請  
捐修三十二年移江甯知府三十五年琅卒總督范成勳疏以世綸輿情愛戴  
請在任守制御史胡德邁疏論世綸乃得去官復居母喪歲餘授蘇州知府仍  
請終制辭不赴三十八年既終制授江南徐淮道四十年湖南按察使員缺九  
卿舉世綸大學士伊桑阿入奏聖祖諭曰朕深知世綸廉但遇事偏執民與諸  
生訟彼必袒民諸生與摺紳訟彼必袒諸生處事惟求得中豈可偏執如世綸  
者委以錢穀之事則相宜耳是歲授湖南布政使湖南田賦丁銀有徭費漕米  
有京費世綸至盡革徭費減京費四之一民立石頌之四十三年移安徽布政  
使四十四年遷太僕寺卿四十五年坐湖南任內失察營兵掠當舖能職三月  
授順天府府尹疏請禁司坊擅理詞訟奸徒包攬捐納牙行霸占貨物流娼歌  
舞飲宴飭部議定爲令四十八年授左副都御史兼管府尹事四十九年遷戶

部侍郎督理錢法尋調總督倉場五十四年授雲南巡撫未行調漕運總督世綸察漕積弊革羨金劾貪弁除盜役以嚴明爲治歲督漕船應限全完無稍愆誤時西陲用兵轉輸餽餉自河南達陝西陝西旱饑五十九年上命世綸詣陝西佐總督鄂海督軍餉並令道中勘河南府至西安黃河輓運路徑並察陝西見存穀石數目陳奏世綸乃派河西上疏言河南府孟津縣至陝西太陽渡大小數十餘灘緯道高低不等或在河南或在河北泄池以下舟下水可載糧三百餘石上水載及其半灑池以上河流高迅僅可數十石自砥柱至神門無緯道惟路旁石往往有方眼又有石鼻從前輓運其蹟猶存自陝州至西安府河水平穩俱有輓運路徑謹繪圖以聞又言河南府至陝州三門今乃無舟請自太陽渡以下改車運太陽渡至西安府黨家馬頭舟行爲便黨家馬頭入倉復改車運穀二十萬石都銀十萬三千兩有奇但運穀二十萬止得米十萬請令河南以二穀易一米則運價可省其半若慮米難久貯請照例出陳易新奏入上念陝西災發帑金五十萬並令酌發常平倉穀又以地方官吏大半在軍

前令選部院司官詣陝西命世綸總其事世綸令分十二路察貧民按口分給遠近皆遍六十年春得兩災漸澹上命世綸還理漕事六十一年四月以病乞休溫旨慰留令其子廷祥馳驛省視五月卒遺疏請隨父琅葬福建上允之詔獎其清慎勤勞予祭葬世綸富官聰強果決摧抑豪猾禁城胥吏所至有惠政民號曰青天在江甯以憂歸民乞留者逾萬既不得請人出一錢建兩亭府署前號一文亭官府尹步軍統領託合齊方貴幸出必擁騶從世綸與相值拱立道旁俟託合齊下輿驚問世綸抗聲曰國制諸王始具騶從吾以爲諸王至拱立以俟不意爲汝也將疏劾託合齊謝之乃已賑陝西陝西積儲多虛耗將疏劾鄂海以廷祥知會密語微及之世綸曰吾自入官身且不顧何有於子卒疏言之鄂海坐罷去

論曰于成龍秉剛正之性苦節自厲始終不渝所至民懷其德彭鵬拒僞命立身不苟在官亦以正直稱陳璘起自海濱一介不取行能踐言陳鵬年施世綸廉明愛人不畏強禦之五人者皆自牧令起以清節聞於時成龍世綸名尤盛

閭巷誦其績久而弗渝康熙間吏治清明廉吏接踵起聖祖所以保全諸臣其效大矣

清史稿

列傳六十五

慕天顏

阿山

噶禮

慕天顏字拱極甘肅靜寧人順治十二年進士授浙江錢塘知縣遷廣西南寧同知再遷福建興化知府康熙九年擢湖廣上荆南道總督劉兆麒疏言天顏習邊海諸事請調福建興泉道尋擢江蘇布政使十二年喪母總督麻勒吉巡撫瑪祜疏言天顏廉明勤敏清積年逋賦釐剔挪移事未竟請令在官守制十三年入覲疏言江南田地錢糧有隱占詭寄諸弊臣飭州縣通計田額均分里甲又因科則不等立徵收截票之法每戶實徵錢糧分十限於開徵日給限票依限完納截票逾限未截按數追比吏不能欺民下部著爲令十五年擢江南巡撫疏進錢糧交代冊上嘉其清晰命布政使交代當以此爲式尋以節減驛站錢糧加兵部侍郎師征吳三桂大將軍貝勒尙善請造船濟師下天顏督造送岳州敘勞加太子少保兵部尙書仍兼右副都御史時諸道兵應徵發舳舻

蔽江夫役牽挽動以千萬計天顏疏言緯夫募諸民間夫給銀一錢民爭逃匿計里均派先期拘集飢寒踣頓及兵既到計船給夫兵與船戶橫索財物鞭撻死傷臣擬軍赴前敵仍給緯夫其凱旋還京並各省調遣歸標官兵每船應夫若干以其直給船戶令雇水手上從之命下直省著爲令江南水道交錯天顏爲布政使時請於巡撫瑪祜溶吳淞江劉河淤道十九年江南困漕雨疏言附近吳淞江劉河諸州縣水道通暢旋溢旋消宜興常熟武進江陰金壇諸縣水無出路或要口涇塞致積雨成壑常熟白茆港爲長洲崑山無錫諸水出海要道武進孟瀆河爲丹陽宜興金壇諸水歸江要道請動帑疏濬上從之於是濬白茆港四十三里達海濬孟瀆河四十八里達江皆建閘以時啓閉費帑九萬有奇又嘗疏請減浮糧除版荒坍沒公占田地部議坍沒許豁除版荒令覆勘二十年疏請募民墾版荒六年後起科揚州知府高德貴虧帑數萬旣劾罷旋卒天顏疏銷草豆價戶部覈減七千有奇天顏檄追德貴家屬京口防禦高騰龍德貴族也與參領馬宗駿以天顏奏銷浮冒許於將軍楊鳳翔鳳翔格不行

總督阿席熙劾崇駿騰龍雙取上遣郎中圖爾宸鍾有德會天顏勘治崇駿騰龍叩閣訟天顏奏銷浮冒惡其訐告構罪狀峻總督劾奏上命圖爾宸鍾有德具獄崇駿騰龍雙取罪至死天顏以草豆價戶部覈減諉罪德貴當左遷得旨如議天顏將去官疏列成勞且言夙夜冰兢精白不意遭誣訐蒙鑒宥不加嚴譴上以天顏未聞有廉名乃自言冰兢精白非是命嚴飭二十三年起湖北巡撫復諭之曰爾前爲巡撫未能潔己率屬今宜痛改前非廉謹自持以副任使旋移貴州二十六年授漕運總督疏言京口至瓜洲漕船往來風濤最險請做民間渡生船官設十船導引護防部議非例不允上曰朕南巡見京口瓜洲往來人衆備船過渡有益於民其如所請行天顏疏陳江南江西累年未完漕項銀米請恩贖上命盡免康熙十七年以前積逋江南揚州淮安所屬連河東瀕海諸州縣地卑下謂之下河頻歲被水上先用湯斌議遣侍郎孫在豐疏濬下河河道總督靳輔議起翟家壩訖高家堰築重隄束隄堰溢出之水北出清口謂疏濬無益天顏仍主疏濬並修築高家堰與不協上遣尙書佛倫熊一瀟給



事中達奇納趙吉士會勘佛倫等主用輔議天顏在豐議與輔異天顏密疏力爭輔疏劾天顏與在豐有連欲在豐建功故堅阻上游築隄下部議奪天顏職而輔亦爲御史郭琇陸祖修給事中劉楮交章劾罷初輔請於仲家莊建開引駱馬湖水別鑿中河俾漕船避黃河之險天顏亦議爲無益上命學士開音布侍衛馬武往視還奏天顏令漕船毋入中河上以責天顏逮下獄天顏反覆申辨副都御史噶爾圖舉天顏訴辭先後互異坐奏事上書不以實論罪上追錄天顏造舟濟師特寬之三十五年卒天顏歷官有惠績嘗疏請有司虧帑雖逾限於發遣前清償仍貰其罪獄囚因逸犯株連待質已三年者於秋審時開釋獄囚無親屬饋食月給米三斗皆恤下之政在江南興水利蠲積逋而請免絳夫姓一時之困江南民尤頌之獨劾嘉定知縣陸隴其不協於輿論左都御史魏象樞疏言天顏劾隴其稱其操守絕一塵德有餘而才不足今之有司惟操守爲難既知之矣何不留以長養百姓請嚴飭諸督撫大破積習勿使廉吏灰心貪風日長會詔舉清廉象樞遂以隴其應語具隴其傳

阿山伊拉哩氏滿洲鑲藍旗人初自吏部筆帖式歷刑部主事戶部員外郎康熙十八年授翰林院侍講七遷至戶部侍郎三十年命治賑西安鳳翔二府明年還京上聞流民有至襄陽者以問阿山阿山言正月已得雪民無流亡上曰正月雖雪二三月雨不時麥收未可望流民至襄陽甚多汝未之知耳坐奉使不盡心左授郎中三十三年擢左副都御史三十五上年親征噶爾丹阿山從授阿密達爲將軍遂噶爾丹阿山爲參贊師還授盛京禮部侍郎三十六年授翰林院掌院學士三十九年授江南江西總督安徽布政使張四教以憂去官巡撫高永爵劾四教擅動庫帑下阿山察奏阿山言四教動庫帑爲公用請免議上復命具實狀以聞阿山乃言三十八年上南巡四教發庫帑十一萬供辦議令各官扣俸抵補各官皆自承臣不敢隱上責阿山徇情沽譽命漕運總督桑額鞫四教論如律阿山當奪職上寬之命留任四十三年阿山劾江西巡撫張志棟大計不公志棟及布政使李興祖按察使劉廷瓊道員韓象起等皆奪職阿山又言大計志棟主之請復興祖等官給事中許志進劾阿山恩威自擅

阿山疏辨且詆志進爲淮安漕標管卒子素行不端爲志棟報復志進亦追論阿山庇張四教並收屬吏賄賂盜倉穀不問貪淫惡蹟縱妾父生事疏並下部議部議皆奪職上復寬阿山命留任如故四十四年疏劾江南知府陳鵬年貪酷並以妓樓改建講堂瀆聖論大不敬命會桑額及河道總督張鵬翮集議坐鵬年罪至斬上特命來京事具鵬年傳阿山與桑額鵬翮議自泗州開河築隄引淮水至黃家堰入張福口會出清口是爲溜淮套疏請上臨視四十五年授刑部尙書四十六年上南巡臨視溜淮套諭曰阿山等奏溜淮套別開一河分洩淮水繪圖進呈朕策騎自清口至曹家廟見地勢甚高雖成河不能直達清口與所進圖不同且所立標竿多在民冢上朕何忍發此無限枯骨耶命鵬翮罷其事下九卿議阿山及桑額鵬翮皆奪職上以阿山主其議命但坐阿山遂奪職五十一年江蘇布政使宜思恭以虧帑坐譴因列訴總督噶禮等頻向需索阿山亦受節餽下部議上以阿山老寬之五十二年萬壽復原品逾年卒阿山故精察上嘗問大學士李光地阿山在官何若光地奏臣嘗與同僚廉幹果

於任事其失民心獨劾陳鵬年一事耳上頷之

鳴禮棟鄂氏滿洲正紅旗人何和哩四世孫也自廢生授吏部主事再遷郎中康熙三十五上親征噶爾丹次克魯倫河鳴禮從左都御史于成龍督運中路兵糧首達行在召對當上意尋擢盛京戶部理事官歲餘三遷授內閣學士三十八年授山西巡撫鳴禮當官勤敏能治事然貪甚縱吏虐民撫山西數年山西民不能堪會潞安知府缺員鳴禮疏薦霍州知州李紹祖紹祖使酒自劾鳴禮匿不以奏上聞之下九卿議罪擬奪鳴禮職上寬之御史劉若鼎疏論鳴禮貪得賊無慮數十萬太原知府趙鳳詔爲其腹心專用酷刑以濟貪壑事下鳴禮復奏得辨釋平遙民郭明奇等以鳴禮庇貪婪知縣王綬走京師詣巡城御史袁橋列訴橋疏聞並言鳴禮通省錢糧加火耗十之二分補大同臨汾等縣虧帑餘並以入已得四十餘萬指修解州祠宇用巡撫印簿勒捐令家伶赴平陽汾州潞安三府迫富民饋遺又以訟得臨汾介休富民亢時鼎梁湄金縱汾州同知馬選庇洪洞知縣杜連登皆貪吏隱平定雹災凡七事上命鳴禮復

泰山西學政鄒士瓌代太原士民疏留噶禮御史蔡珍疏劾士瓌職在衡文乃與巡撫朋比且袁橋疏得旨二日後太原士民卽具呈顯爲誣僞噶禮與士瓌同城委爲不知是昏愎也知而不阻是倖恩也請併劾部議處尋噶禮復奏以明奇等屢坐事走京師誣告並辨橋珍所言皆無據下九卿察奏明奇等下刑部治罪橋珍坐誣譴罷四十八年遷戶部侍郎旋擢江南江西總督噶禮至江南益恣肆累疏劾江蘇巡撫于準布政使宜思恭按察使焦映漢皆坐罷知府陳鵬年初爲總督阿山劾罷上復命守蘇州及宜思恭罷署布政使鵬年素伉直忤噶禮噶禮續劾宜思恭虧帑又論糧道賈樸建關開河皆有所侵蝕遂及鵬年覈報不實鵬年復坐罷噶禮復密疏鵬年虎邱詩怨望上不爲動巡撫張伯行有廉聲至則又與噶禮忤五十年伯行疏言本科江南鄉試取士不協與論正考官副都御史左必蕃亦檢舉同考官知縣王曰兪方名所薦士有不通文字者上命尙書張鵬翮如揚州會噶禮及伯行察審鵬翮至會讞既得副考官編修趙晉及曰兪名諸交通狀伯行欲窮其獄噶禮盛怒刑證人遂罷鵬伯

行乃劾噶禮謂輿論盛傳總督與監臨提調交通鬻舉人及事發又傳總督索銀五十萬許不竟其事請勅解任就讞噶禮亦劾伯行謂方會讞時臣正鞫囚伯行謂臣言不當臣恐爭論失體緘口結舌伯行遂陰謀誣陷以鬻舉人得銀五十萬汗臣不能與俱生因及伯行專事著書猜忌糊塗不能清理案牘時方有戴名世之獄又言南山集刻板在蘇州印行伯行豈得不知進士方苞以作序連坐伯行夙與友不肯捕治並羅列伯行不職數事疏入上並命解任令鵬翮會漕運總督赫壽察奏獄具管曰兪名及所取士交通得賄當科場舞弊律論罪噶禮劾伯行不能清理案牘事實餘皆督撫會銜題咨舊事苞爲伯行逮送刑部南山集刻板在江甯皆免議伯行妄奏噶禮鬻舉人當奪職上切責鵬翮赫壽略徇又命尙書穆和倫張廷樞覆讞仍如鵬翮等議上諭曰噶禮才有餘治事敏練而性喜生事屢疏劾伯行朕以伯行操守爲天下第一手批不准此議是非顛倒下九卿詹事科道察奏復諭曰噶禮操守朕不能信若無張伯行江南必受其脔削且牛矣即如陳鵬年稍有聲譽噶禮欲害之摘虎邱詩

有悖謬語朕閱其詩初無他意又勅中軍副將李麟騎射皆劣麟比來迎駕朕試以騎射俱優若令噶禮與較定不能及朕於是心疑噶禮矣互劾之案遣大臣往讞爲噶禮所制爾等皆能體朕保全廉吏之心使正人無所疑懼則海宇蒙昇平之福矣九卿等議噶禮與伯行同任封疆互劾失大臣體皆奪職上命留伯行任噶禮如議奪職五十三年噶禮母叩閣言噶禮與弟色勒奇子幹都置毒食物中謀弑母噶禮妻以別戶子幹泰爲子縱令糾衆毀屋下刑部鞠得實擬噶禮當極刑妻論絞色勒奇幹都皆斬幹泰發黑龍江家產沒入官上令噶禮自盡妻從死餘如部議

論曰廉吏往往不獲於上豈長官皆不肯抑其強項固有所不堪歟隴其之廉天顏知之而不能容願年初扼於阿山繼挫於噶禮皆欲中以危法抑又甚矣伯行與噶禮互劾再讞不得直幸賴聖祖仁明隴其復起願年致大用伯行亦終獲全二三正人詘而得申人心風氣震盪洋溢所被至遠噶禮不足以語此蓋天顏阿山亦弗能喻也

清史稿

列傳六十六

楊方興

朱之錫

道 監 理

靳輔

保 陳

周 本 文 選

于成龍

周 保 任 監

張鵬翮

楊方興字淳然漢軍鑲白旗人初爲廣甯諸生天命七年太祖取廣甯方興來歸太宗命直內院與修太祖實錄崇德元年試中舉人授牛錄額真銜擢內秘書院學士性嗜酒嘗醉後犯蹕論死上貫之命斷酒順治元年從入關七月授河道總督李自成決河灌開封其後屢決屢塞賊勢浸張土寇羣起兩岸防守久廢伏秋汛發北岸小宋口曹家寨隄潰河水漫曹單金鄉魚臺四縣自蘭陽入運河田產盡沒方興至官遣兵捕治土寇掃穴擒渠乃疏請修築二年七月河決流通集分兩道入運河運河受河水激濁淤塞下流徐邳淮揚亦多衝決方興以防護無功自劾上諭以殫力河防不必引咎旋疏薦補管河道方大猷等四年流通集決口將合河下注湍激又決汶上入獨山湖方興請修築通濟



開上下隄岸並淮安東北蘇淤馬羅等隄又築江都高郵諸石隄流通集合口  
進兵部尙書銜七年加太子少保八月河決荆隆口南岸出單家寨北岸出朱  
源寨南岸先合河全注北岸張秋以下隄盡潰自大清河東入海方興用大猷  
議於上游築長縷隄遏其勢復築小長隄塞決口期半年歲事九年方興復乞  
休不許大猷擢江南按察使方興請以新銜管河務九年荆隆口工竟方興疏  
言清口淮黃交匯黃強淮弱歲需疏濬請於清江通濟二閘適中處修復福興  
閘啓一閉二以時蓄洩從之給事中許作梅御史楊世學陳棨交章請勘九河  
故道導河北流入海方興言河古今同患而治河古今異宜宋以前治河但令  
赴海有路可南亦可北元明迄我清東南漕運自清口迄董家口二百餘里藉  
河爲轉輸河可南必不可北若欲尋禹舊蹟導河北行無論漕運不通恐決出  
之水東西奔蕩不可收拾勢須別築數千里長隄較之增卑培薄難易顯然且  
河挾沙以行束之爲一則水急沙流播之爲九則水緩沙壅數年後河仍他徙  
何以濟運臣愚以爲河不能無決決而不築司河者之罪河不能無淤淤而不

溶亦司河者之罪若欲保其不決不淤誰敢任之請敕下廷議定畫一之規屏  
二二三之說俾有所遵守疏入上嘉納焉十年河決大王廟距朱源塞口不遠給  
事中周體觀劾方興治河罔效方興疏辨因請罷斥溫詔慰留十一年給事中  
林起龍復劾方興侵蝕工需累民捐費至六十餘萬並劾大猷等奸貪不法上  
解方興任命入都質對起龍以誣譴方興復任既直隸總督李蔭祖復劾大猷  
貪婪誤工方興亦劾大猷上以其不先舉發切責之給事中董篤行又劾方興  
徇庇降級留任十四年乞休上念其勞以原官加太子太保致仕方興還京師  
所居僅蔽風雨布衣疏食四壁蕭然康熙四年卒賜祭葬

朱之錫字孟九浙江義烏人順治三年進士改庶吉士授編修十一年七月擢  
弘文院侍讀學士四遷至吏部侍郎十四年楊方興乞休上特擢之錫以兵部  
尚書銜總督河道駐濟甯十五年十月河決山陽柴溝建義馬邏諸隄並溢之  
錫馳赴清江浦築戢隄塞決口宿遷董家口爲沙所淤就舊渠進東別開河四  
百丈通運道十六年條上治河諸事言河南歲修夫役近屢經奏減宜存舊額

明制准工兼用民修宜復舊例揚屬運道與高寶諸湖相通淮屬運道爲黃淮  
交會舊有各隄閘宜擇要修葺應用柳料宜令瀕河州縣預爲籌備奸豪包占  
夫役賣富僉貧工需各物私弊百出宜責司道府廳查報徇隱者以瀆職論額  
設水夫陰雨不赴工所扣工食謂之曠盡宜令管河廳道嚴嚴河員升調降用  
宜令候代始行離任河員有專責不宜別有差委歲終察覈舉劾並宜復舊例  
皆下部議行之錫丁毋憂命在任守制疏請歸葬優詔給假治喪十七年還任  
以捐金賑淮揚徐三府災加太子少保康熙元年河決原武祥符蘭陽縣境東  
溢曹縣復決石香爐村之錫檄濟寧道方兆及董曹縣役而赴河南督塞西閘  
塞單家寨時利驛蔡家樓策家寨諸決口四年二月疏言南旺爲運河之脊北  
至臨清南至台莊四十餘閘全賴啓閉得宜瀕河春常少雨伏秋雨多東省久  
旱山泉小者多枯大者已弱若官船經閘應閉者強之使開洩水下注則重運  
之在上者阻應開者強之使閉留水待船則重運之在下者又阻乞飭各遵例  
禁得旨非奉極要差遣擅行啟閉者准參奏八月疏言部議停差北河中河南

河南旺夏鎮通惠諸分司歸併地方官臣維河勢變幻工料紛繁天時不齊非水則旱或綱繆幾先或補葺事後或張皇於風雨倉遽之際或調劑於左右方圓之間北河所轄三千餘里其間三十餘閘中河所轄黃運兩河董口尤運道咽喉青黃交接濁流易灌南河所轄在淮黃江湖之間相距窳遠南旺泉源三百餘處近者或出道隅遠者偏蔽僻壤夏鎮地屬兩省鑿石通漕形勢陡絕節宣閘座尤費經營通惠浮沙易淺峻水易衝塞決之役歲歲有之若云歸併府佐則職微權輕上下掣肘至於地方監司責以終年累月奔馳駐守揆之事勢萬萬不能分司與各道界壤迥不相同應合而分一閘座也上流以爲應閉下流以爲應開一額夫也在此則欲求多在彼又復患少不但紛競日多必致牽制誤事應請仍循舊制得旨允行五年二月卒直隸山東河南總督朱昌祚疏言之錫治河十載綱繆旱溢則盡瘁听宵疏濬隄渠則馳驅南北受事之初河庫貯銀十餘萬頻年撙節見今貯庫四十六萬有奇覈其官守可謂公忠及至積勞瘁疾以河事孔亟不敢請告北往臨清南至邳宿夙病日增遂以不起年

止四十有四未有子嗣願請恩卹賜祭葬徐堯淮揚間頌之錫惠政相傳死爲  
河神十二年河道總督王光裕請錫封號部議不行乾隆四十五年高宗南巡  
視河工始允大學士阿桂等請封助順永甯侯春秋祠祭嗣加號曰佑安民稱  
之曰朱大王崔維雅字大醇直隸大名人順治三年舉人授濬縣教諭遷河南  
儀封知縣儀封瀕河歲苦泛濫北岸三家莊當水衝十四年水勢北注岸崩五  
里餘維雅於上游故流疏使東行北岸得安復與塞封邱大王廟決口之錫疏  
薦擢開封南河同知康熙元年五月曹縣石香爐村河決士民求速塞維雅持  
不可工將成復潰至冬乃塞如維雅言遷浙江甯波知府光裕疏薦擢河南河  
道副使時沿河千餘里險工迭出維雅常預爲之備得無事陽武潭口寺隄直  
河衝水勢迅急下掃輒墊維雅預於上流疏引河掃定隄得固虞城距河隄僅  
數里隄沒入河北岸引河衝刷不利維雅預迎河溜挑濬及秋水歸新河舊河  
爲平陸桃源七里溝河屢塞屢決光裕檄維雅往勘維雅言引河淺狹流緩沙  
停淤盜無力宜令河頭加寬闢使足翁受全河又待河水突漲乃使開放建瓴

直下又言下游數十里已成平陸而引河僅百丈節短勢蹙力不能刷淤當接挑二百丈闊損十之八而深半之又言開放當在河頭西北留近埽五丈勿開則河流入口有倒瀉之勢埽亦迎流下光裕悉用其議復遷河南按察使湖南廣西布政使內召爲大理寺卿卒維雅治河主疏導引河使水有所歸故屢有功而後不爲忠當新輔興大工時維雅奏上所著河防芻議兩河治略並詆諆輔所行諸法列二十四事難之輔疏辨謂維雅說不可行寢其議

新輔字紫垣漢軍鑲黃旗人順治九年以官學生考授國史館編修改內閣中書遷兵部員外郎康熙初自郎中四遷內閣學士十年授安徽巡撫疏請行溝田法以十畝爲一畝二十畝爲一溝溝土累爲道道高溝低澇則洩水旱以灌田會三藩亂起不果行部議裁驛站經費輔疏請禁差員橫索騷擾驛遞歲終節存驛站槓脚等項二十四萬有奇上獎輔實心任事加兵部尙書銜十六年授河道總督時河道久不治歸仁隄王家營邢家口古溝翟家壩等處先後潰溢高家堰決三十餘處淮水全入運河黃水道上至清水潭浸濬四出礪山以

東兩岸決口數十處下河七州縣淹爲大澤清口澗爲陸地輔到官周度形勢博探輿論爲八疏同日之上首議疏下流自清江浦至雲梯關於河身兩旁離水三丈各挑引河一道俟黃淮下注新舊河合爲一卽以所挑土築兩岸大隄南始白洋河北始清河縣並東至雲梯關雲梯關至海口百里近海二十里湖大土漏不能施工餘八十里亦宜量加疏濬築隄以東之限二百日畢工日用夫十二萬三千有奇次議治上流淤墊洪澤湖下流自高家堰西至清口爲全淮會黃之所當於小河兩旁離水二十丈各挑引河一道分頭衝洗次議培修七里墩武家墩高家墩高良澗至周橋閘臨湖殘缺隄岸下築坦坡使水至平漫而上順縮而下不至怒激崩衝隄一尺坦坡五尺夯杵堅實種草其上次議塞黃淮各處決口例用埽費鉅且不耐久求築土禦水之法宜密下排椿多加板纜用蒲包裹土麻繩縛而填之費省而工固次議閉通濟閘壩濬清口至清水潭運河二百三十里以所挑之土傾東西兩隄之外西隄築爲坦坡東隄加培堅厚次議規畫經費都計需銀二百十四萬八千有奇宜令直隸江南浙江

山東江西湖北各州縣預徵康熙二十年錢糧十之一約二百萬工成後令淮揚被水田畝納三錢至一錢運河經過商貨米豆石納二分他貨物斤四分並開武生納監事例如數補還次議裁併冗員明定職守并嚴河工處分諱決視諱盜兼請調用官吏工成與原屬河廳官吏並得優叙次議工竣後設河兵守隄里設兵六名至二名都計五千八百六十名疏入下廷議以方軍興復舉大工役夫每日至十二萬餘召募擾民應先擇要修築上命輔熟籌十七年輔疏言以馳運土可減募夫之半初擬二百日畢工今改爲四百日又可減募夫之半河工故事大隄謂之遙隄隄內復爲隄過水謂之縷隄兩隄間爲橫隄謂之格隄輔疏請就原估土方加築縷隄有餘量增格隄南自白洋河北自清河上至徐州視此興築餘並如前議疏入復下廷議允行上諭以治河大事當動正項錢糧輔疏言前議黃河兩岸分築遙縷二隄勘有舊隄貼近河身擬作爲縷隄其外更築遙隄前議用馳運土今議改車運前議離隄三十丈內不許取土今因宿遷桃源等縣人弱工多改令二十丈外取土前議河身兩旁各挑引河



一道今以工費浩繁除清河北岸淺工必須挑濬餘俱用鐵桶帶濬深河底下部議從之是歲吳三桂死上趣諸將帥進兵輔欲節帑佐軍又以興工後需費溢出原估均頗改前議先開清口引河四道塞高家堰王家岡武家墩諸決口築隄束水如所議施行順下流未大治伏秋盛漲水溢出隄上復決礪山石將軍廟蕭縣九里溝輔乃議設減水壩於蕭碭宿遷桃源清河臨縣河南北兩岸爲壩十三壩七河水盛藉以宣洩輔復察清口淮黃交會黃漲枝灌運河乃自新莊岡西南開新河至太平壩又自文華寺開新河至七里岡復折向西南亦至太平壩改以七里岡爲運口山武家墩爛泥淺轉入黃河運口距黃淮交會處約十里自此無淤墊之患疏報並議行輔勘清水潭決口屢塞屢衝乃棄深就淺築東西長隄二道並挑新河八百四十丈疏積水山陽高郵等七州縣民田至是皆出水可耕十八年輔疏報並請名新河曰永安河報聞翟家壩淮河決口成支河九道輔飭淮揚道副使劉國靖等督堵塞至是工竟輔詣勘疏報並言山陽資應高郵江都泗州縣淤水諸湖逐漸涸出臣今廣爲招墾俾增賦

足民上下均利屯田之議自此起漕船自七里關出口行駱馬湖達竊灣夏秋盛漲冬春水涸重運多阻輔議溶湖旁旱河故道上接泃河通運疏入下廷議上問諸臣意若何左都御史魏象樞曰輔請大修黃河上發帑二百五十一萬計一勞永逸前奏隄壩已築十之七今又欲別開河道所謂一勞永逸者安在臣等慮漕運有阻故議從其請上曰象樞言良是河雖開必上流浩瀚方免淤滯今雨少水涸恐未必有濟即已成諸工亦以旱易修豈得恃爲永固耶十九年五月輔丁憂命在任守制秋河復決輔疏請處分上趣輔修築二十年三月輔疏言臣前請大修黃河限三年水歸故道今限滿水未歸故道請處分下部議當奪官上命戴罪督修二十一年五月上遣尙書伊桑阿侍郎宋文運給事中王曰溫御史伊喇喀勘工候補布政使崔維雅奏上所著書議盡罷輔所行減水壩諸法大興工日役夫四十萬築隄以十二丈爲率上命從伊桑阿等往與輔議之伊桑阿等遍勘諸工至徐州令輔與維雅議輔疏河言河道全局已成十八九蕭家渡雖有決口而海口大闕下流疏通腹心之害已除斷不宜有

所更張墮成功釀後患伊桑阿等還京師下廷議工部尙書薩穆哈等請以蕭家渡決口責輔賠修上以賠修非輔所能任未允又議維雅條奏伊桑阿請召輔詢之十一月輔入對言蕭家渡工來歲正月當竟維雅所議日用夫四十萬築隄以十二丈爲率皆不可行維雅議乃寢上命塞決口仍動正項錢糧二十二年四月輔疏報蕭家渡合龍河歸故道大溜直下七里溝等四十餘處險汛日加並天妃壩王公隄及運河閘座均應修築別疏請飭河南巡撫修築開封歸德兩府境河隄防上流疎失上均如所請十二月命復輔官二十三年十月上南巡閱河北岸諸工諭輔曰蕭家渡隄壩當培薄增卑隨時修築減水壩原用以洩水遇泛溢橫流安知今日減水壩不爲他年之決口且減水旁流浸灌民田朕心深不忍當籌畫措置上見隄夫作苦駐轡慰勞久之諭輔戒官役侵蝕工食復視天妃閘諭輔宜改革壩並另設七里太平二閘殺水勢舟過高郵見田廬在水中惻然愍念遣尙書伊桑阿薩穆哈察視海口還蹕復閱高家堰至清口閱黃河南岸諸工諭輔連日當添建閘座防黃水倒灌復召輔入行宮

慰諭書閱河堤詩賜之輔以上念減水淹民因議於宿遷桃源清河三縣黃河北岸隄內開新河謂之中河於清河西仲家莊建閘引攔馬河減水壩所洩水入中河漕船初出清口浮於河至張莊運口中河成得自清口截流逕渡北岸度仲家莊閘免黃河一百八十里之險伊桑阿等還奏議疏溶車路串場諸河至白駒丁溪草堰諸口引高郵等處減水壩所洩水入海上命安徽按察使于成龍董其事仍受輔節制奏事由輔疏報二十四年正月輔疏請徐州迤上毛城舖王家山諸處增建減水閘下廷議上諭減水閘益河工無益百姓不可不熟計命遣官與輔詳議若分水不致多損民田卽令興工九月輔疏報赴河南勘黃河兩岸請築考城儀封封邱滎澤隄埝下部議行成龍議疏海口洩積水輔謂下河地卑於海五尺疏海口引潮內侵害滋大議自高郵東車邏鎮築隄歷興化白駒場束所洩水入海隄內涸出田畝丈量還民餘招民屯墾取田價償工費疏聞上謂取田價恐累民未卽許尋召輔成龍馳驛詣京師廷議成龍議開海口故道輔仍主築長隄高一丈五尺束水敵海潮大學士九卿從輔議

通政使參議成其範給事中王又且御史錢珏從成龍議議不決上命宣問下河諸州縣人官京師者侍讀寶應喬萊等乃言從成龍議工易成百姓有利無害從輔議工難成百姓田廬墳墓多傷損且隄高一丈五尺束水至一丈高於民居伏秋潰決爲害不可勝言上頗有成龍遺尙書薩穆哈學士穆稱額詣淮安會漕督徐旭齡巡撫湯斌詳勘二十五年正月薩穆哈等還奏謂民間皆言溶海口無益尋授成龍直隸巡撫罷溶海口議四月召斌爲尙書入對上復舉其事以問斌言溶海口必有益於民上責薩穆哈穆稱額還京時不以實奏奪官召大學士九卿及萊等定議溶海口發帑二十萬命侍郎孫在豐董其役工部劾輔治河已九年無成功上曰河務甚難而輔易視之若遽議處後任者益難爲力今姑寬之仍責令督修二十六年輔疏言連隄減水以下河爲壑東即大海溶海口似可紓水患惟泰州安豐東臺鹽城諸縣地勢甚卑形如釜底若止就此挑溶徒增其深淮流甚漲高家堰洩水洶湧而來仍不能救民田之淹沒臣以爲杜患於流不若杜患於源高家堰堤外直東爲下河東北爲清口當

自翟家壩起至高家堰築重隄萬六千丈束減水北出溝口則洪澤湖不復東  
淹下河下河十餘萬頃皆成沃產而高寶諸湖澤出田畝可招民屯墾以裕河  
庫上使以輔疏示成龍成龍仍言下河宜開重隄不宜築上遣尙書佛倫侍郎  
熊一湛給事中達奇納趙吉士與總督董誥總漕慕子頌會勘佛倫等皆欲用  
輔議天顏在豐與相左佛倫等還奏下廷議會太皇太后崩議未上二十七年  
春給事中劉楷御史郭琇陸祖修交章論輔琇辭連輔幕客陳潢祖修請罷輔  
至以舜殛鯀爲比天顏在豐亦疏論屯田累民及輔阻撓開濬下河狀琇旋劾  
大學士明珠等語復及輔輔入覲亦疏訐成龍天顏在豐等朋比謀陷害上曰  
輔爲總河挑河築隄漕運無誤不可謂無功但屯田下河二事亦難逃罪近因  
被劾論其過者甚多人窮則呼天輔若不陳辨朕前復何所控告耶三月上御  
乾清門召輔與成龍琇等廷辨輔成龍各持所見不相下琇言輔屯田害民輔  
言屬吏奉行不善致民怨因引咎坐罷以王新命代佛倫訥在豐達奇納皆左  
遷天顏吉士並奪官陳潢亦坐譴時中河工初竣上遣學士開音布侍衛馬武

往勘還奏中河商賈舟楫不絕上諭廷臣曰前者于成龍奏河道爲新輔所壞今聞音布等還奏數年未嘗衝決漕運亦不誤若謂輔治河全無所裨微特輔不服即朕亦不愜因遣尙書張玉書圖納左都御史馬齊侍郎成其範徐廷璽閱工遍察輔所繕治孰爲當改孰爲不當改詳勘具奏玉書等還言河身漸次刷深黃水汎溜入海兩岸闌墻有應循舊者有應移改者多守輔舊規十一月上遣尙書蘇赫等閱通州運河命輔偕往請於沙河建閘蓄水通州下流築隄束水從之二十八年正月上南巡閱河輔扈行閱中河上慮逼近黃河水漲隄潰輔對若加築遙隄即無患還京師諭獎輔所繕治河深隄固命還舊秩二十九年漕運總督董誥以北運河水淺擬盡引南旺河水北流倉場侍郎開音布復疏請濬北運河上諸輔言南旺河水盡北流南河必水淺惟從北河兩旁下埽束水自可濟運上命偕開音布董理三十年王新命坐事罷上曰朕聽政後以三藩及河務漕運爲三大事書宮中柱上河務不得其人必誤漕運及輔未甚老而用之亦得紆數年之慮令仍爲河道總督輔以衰弱辭命順天府丞徐

廷舉爲協理會陝西西安鳳翔災上命留江北漕糧二十萬石自黃河運蒲州  
輔疏言水道止可至孟津親詣督運上嘉之輔疏請就高家堰運料小河培隄  
使高廣中河加築遙隄並增建四閘堵塞張莊舊運口皆前此繕治所未竟者  
別疏請復陳潢官並起用熊一瀟達奇納趙吉士輔病劇再疏乞解任命內大  
臣明珠往視傳諭調治十一月卒賜祭葬諡文襄三十五年允江南士民請建  
祠河干四十六年追贈太子太保予拜他喇布勒哈番世職雍正五年復加工  
部尙書子治豫襲職世宗以其侍父在官知河務命自副參領加工部侍郎銜  
協理江南河工陳潢字天一浙江錢塘人負才久不遇過邯鄲呂祖祠題詩壁  
間語豪邁輔見而異焉蹤跡得之引爲幕客甚相得凡輔所建白多自潢發之  
康熙二十三年上巡河問輔孰爲汝佐以潢對二十六年輔疏言潢十年佐治  
勤勞下部議授潢僉事道銜二十七年郭琇劾輔辭連潢輔罷潢削職銜逮京  
師未入獄以病卒輔復起疏請復潢官部議以潢已卒寢其奏潢佐治河主順  
河性而利導之有所患必推其致患之由工主覈實料主豫備而估計不當過



省省則速敗所費較所省尤大慎固隄防主潘季馴東水刷沙之說尤以減水  
壩爲要務有潰決先固兩旁不使日擴乃修復故道而疏引河以注之河流今  
昔形勢不同無一勞永逸之策在時時謹小慎微而尤重在河員之久任張紱  
生探漢所論次爲治河述言十二篇高宗以紱生河圖能得真源命採其書入  
四庫與輔治河奏摺並列宋文運字開之直隸南宮人順治六年進士授山東  
滋陽知縣行取刑部主事再遷吏部郎中掌選政清直守正以魏象樞薦擢鴻  
臚寺少卿累擢刑部侍郎命佐伊桑阿行河上特諭之曰爾有所見當堅持詳  
議毋以伊桑阿爲尙書而阿其意也以病乞休加太子少保致仕卒諡端愨久  
之上猶謂文選司事要文運操守聲名無能及之者董訥字茲重山東平原人  
康熙六年一甲三名進士授編修累擢至江南總督爲政持大體有惠於民左  
遷去江南民爲立生祠二十八年上南巡民執香跪訥生祠前求復官訥江南  
上還蹕笑謂訥曰汝官江南惠及民民爲汝建小廟旋以侍讀學士復出爲漕  
運總督卒熊一瀟字蔚懷江西南昌人康熙三年進士改庶吉士授浙江道監

察御史請罷投誠武官改授文官例並議裁併各關皆下部議行累官工部尙書坐奪官以輔遺疏薦起太常寺卿復至工部尙書致仕卒孫學鵬進士官廣東巡撫

于成龍字振甲漢軍鑲黃旗人康熙七年自廕生授直隸樂亭知縣八年署灤州知州以逸囚當降調樂亭民列善政兩叩閹籲留下巡撫金世德勘實得復任十三年以緝盜逾限未獲又當降調世德疏請留上特許之十八年遷通州知州二十年直隸巡撫于成龍遷兩江總督疏薦可大用會江甯府缺員疏請敕廷臣推清操久著與相類者上即以命成龍二十三年上南巡至江甯嘉成龍廉潔親書手卷賜之超擢安徽按察使上還京師賜其父參領得水貂裘並諭八期諸大臣有子弟爲外吏者各貽書訓勉視得水之教成龍上以江南下河諸州縣久被水敕議疏浚命成龍分理仍聽河道總督靳輔節制輔請於上流築隄束水成龍擬疏海口濬下河水道持異議上遣尙書薩穆哈學士穆稱額往諮於民薩穆哈等還奏言衆謂浚海無益乃命緩興工二十五年二月授

成龍直隸巡撫入對上問治畿輔利弊應興革者宜何先成龍對引盜爲先姦宄倚旗下爲淵藪有司莫敢誰何臣當執法治之瀕行賜白金千表裏二十端上官疏言引盜當力行保甲旗下莊屯不屬於州縣本族統領遠在京師僅有撥什庫在屯未能約束應令旗人與民戶同編保甲撥什庫鄉長互相稽察盜發無問所劫爲旗爲民協力救護得盜賞藏盜縱盜罰又疏言燕山六衛所轄遼闊與州縣不相統屬盜發止責汛弁捕治而衛官置不問請以衛地屬所近州縣同編保甲並於通州盧溝橋黃村沙河各設捕盜同知守備以下分汛墩臺及旗下莊屯悉歸稽察並下部議行先後捕治旗丁沈顛太監張進昇及大盜司九張破樓子等寘於法二十六年上獎成龍廉能加太子少保幸霸州成龍朝行在賜白金千馬具黃鞍轡湖廣巡撫張汧以貪被劾命與副都御史開音布山西巡撫馬齊往按得實論如律初成龍分理下河未興工而罷上又以湯斌言復命濟治以侍郎孫在豐董其役輔仍主重隄束水並議開中河疏攔馬河減水壩所洩水上命學士禪布以疏示成龍成龍力主濬下河罷築重隄

並謂中河雖開無益輔詣京師疏言在豐及總漕募天顏附和成龍朋謀陷害成龍自湖廣還上命諸臣廷辨之輔言潞海口慮倒灌成龍言高家堰築隄縱上流水不來而秋雨時至天長六合諸水洩歸何處故海口仍當潞上罷輔代以王新命及中河工竟遣學士開音布侍衛馬武閱視還奏天顏令漕船退出中河上逮問天顏天顏發成龍私書屬毋附輔下廷臣議削太子少保降調命留任二十九年遷左都御史兼鑲黃旗漢軍都統三十一年新命罷輔復爲河督旋卒上以命成龍輔領帑購柳束工部駁減成龍數無虛冒輔築高家堰重隄募夫遠方預給銀安家工中止未扣抵新命題銷格部議成龍復以請上並與豁免三十三年召詣京師疏言連河自通州至嶧縣黃河自萊澤至碭山隄卑薄者皆宜加築高厚並高家堰諸處改石工毛城鋪諸處疏引河及清江浦迤下並江都高郵諸隄工策大舉修治別疏請設道員以下各官又計工費請開捐例減成核收並推廣休革各員上至布政使皆得捐復上召成龍入問開捐例得無累民成龍言無累請益力上廷折之成龍乃請罪上因問爾嘗短靳

輔謂減水壩不宜開今果何如成龍曰臣彼時妄言今亦視輔而行廷臣議成龍懷私妄奏當奪官上命留任仍興舉簡要各工乃請先將高家堰土隄改築石工三十四年命復官旋丁父憂還京師以董安國代上親征噶爾丹再出塞命成龍以左都御史銜督餉噶爾丹竄死予拜他喇布勒哈番世職三十七年命以總督銜管直隸巡撫請修永清固安渾河隄並加以濬治上爲改河名曰永定旋疏請設南北岸分司董安國能復授河道總督三十八年上南巡臨閱高家堰歸仁隄諸處諭以增築疏濬諸事尋以病乞假命在任調治遣醫往視三十九年卒賜祭葬諡襄勤係在豐字配瞻浙江德清人康熙九年一甲二名進士授編修直起居注充日講官進講屢稱旨累遷工部侍郎仍兼翰林院學士二十六年命率郎中鄂素等赴淮揚濬海口鑄監修下河工部印授之在豐疏言開新不如循舊築高不如就低迤邐不如取近施工以岡門鎮爲最先次白駒場次丁溪場次草堰上悉從之並以在豐請令輔閉高家堰及高郵諸減水壩輔仍主築隄束水上令輔會總督董訥總漕慕天顏及在豐集議遂會疏

用輔讓在豐監修海口岡門鎮白駒工已畢丁溪草堰工俱停上以諮成龍成龍言上道在豐監修下河萬民歎頌今岡門白駒諸工將竣而輔又以爲無益欲於高家堰等處築隄在豐先經履勘始行興工若果無益何待開濬年餘又會議請停此實臣所不能解也二十七年任豐疏劾輔阻撓下河輔亦劾在豐與天顏結婚姻附和成龍下廷臣議輔罷成龍坐鵠秩責在豐前後言不贊降調上命仍以翰林官用俄授侍讀學士二十八年遷內閣學士卒開音布西林覺羅氏滿洲正白旗人自筆帖式授內閣中書累遷至左副都御史康熙二十六年偕成龍按湖廣巡撫張汧論罪如律二十七年擢戶部侍郎命監理高郵寶應下河工程二十八年上南巡成龍扈行命與侍郎徐廷璽閱視下河還奏丁溪至白駒水三道入海上流馮家壩引河當仍開濬餘工悉可停乃召開音布還授正白旗滿洲副都統尋擢步軍統領邊兵部尙書授鑲白旗滿洲都統三十八年命專管步軍統領四十一年卒諡肅敏

張鵬翮字蓮青四川遂寧人康熙九年進士選庶吉士改刑部主事累遷禮部

郎中十九年授江南蘇州知府丁母憂除山東兗州知府舉卓異擢河東鹽運使內遷通政司參議轉兵部督捕副理事官從內大臣索額圖等勘定俄羅斯界還擢大理寺少卿二十八年授浙江巡撫疏言紳民願輸捐穀四合力不能者聽旋以杭州嘉興等府秋收歉薄請暫免輸穀上曰昨歲浙江被災循例蠲賦並豁免錢糧豈可強令捐輸鵬翮原題力不能者聽自相矛盾下部議奪官上寬之尋授兵部侍郎督江南學政三十六年遷左都御史三十七年遷刑部尚書授江南江西總督三十八年上南巡命鵬翮扈從入京賜朝服鞍馬弓矢初陝西巡撫布喀劾四川陝西總督吳赫等侵蝕貧民籽粒銀兩命鵬翮與傅臘塔往按還奏未稱旨命鵬翮與傅臘塔復往陝西詳審三十九年春還奏布喀吳赫及知州尚佳選知縣張鳴遠等侵蝕挪用各擬罪如律上諭大學士曰鵬翮往陝西朕留心訪察一介不取天下廉吏無出其右尋授河道總督入辭上諭令毀攔黃埔通下流溶芒稻河人字河引湖入江鵬翮到官請撤協理徐廷璽及河工隨帶人員並乞敕工部毋以不應查駁之事阻撓並從之尋疏言

臣過雲梯關見攔黃壩巍然如山下流不暢無怪上流之潰決應拆攔黃壩挑  
溶河身與上流一律寬深又言清口淤墊應於張福口開引河引清水入連敵  
黃建岡以時啟閉又言人字河至芒稻山分二派又名芒稻河應溶使暢流並  
溶鳳凰橋引河及雙橋灣頭二河皆匯芒稻河入江俱下部議行尋以攔黃壩  
既撤河身開溶深通暢流入海疏請賜名大通口上嘉鵬翮章奏詞簡意明治  
事精詳遣員外郎拖抗拖和中書張古禮馳驛令鵬翮舉所規畫入奏鵬翮疏  
陳開溶引河運口培修河岸隄壩諸事並下部速議行尋又疏陳河工諸弊並  
請河員承挑引河偶致淤墊免其賠修夫役勞苦工成日請給印票免雜徭上  
嘉其陳奏切要周備尋又請於歸仁隄五堡建磯心石岡並於三義壩舊中河  
築隄改入新中河合爲一河便糧艘通行上謂所議甚當並如所請上倚鵬翮  
治河謂鵬翮得治河祕要諭大學士曰鵬翮自到河工日乘馬巡視隄岸不憚  
勞苦居官如鵬翮更有何議鵬翮以修治事狀遣郎中王進柑入奏上諭進柑  
歸語鵬翮加意防守高家堰鵬翮乃增築月隄及旁近諸隄壩洪澤湖溢泗州



盱眙被災上詢修治策鵬翮言泗州盱眙屢被災即開六壩亦不能免上怒曰  
塞六壩乃于成龍題請不自鵬翮始頃因泗州盱眙災令與阿山議修治非欲  
開六壩救泗州盱眙而令淮揚罹水患也鵬翮何昏憤乃爾四十一年鵬翮疏  
請加築清河縣黃河南北岸戢隄天妃閣改築運口草壩建石壩改下家莊土  
隄爲石隄皆議行又以桃源城西煙墩黃水大漲請加築衛城月隄並於邵家  
莊顏家莊開引河上慮部議遲延特尤之四十二年上南巡視河製河臣箴淮  
黃告成詩以賜並書榜資鵬翮父烜山東泰安沂州等州饑上命截漕二萬石  
交鵬翮往賑鵬翮令河員勸常平倉穀二十八萬餘石散賑疏請以山東各官  
俸工補還上責鵬翮河員發倉穀逆警乃令山東各官補還鵬翮謝罪仍以殫  
心宣力清潔自持加太子太保河決時家馬頭數年未堵塞鵬翮以淮安道王  
謙言劾山安同知佟世祿冒帑誤工奪官追償世祿再叩關上令尙書徐潮按  
治鵬翮謙坐誣劾當譴上特寬鵬翮工部侍郎趙世芳又劾鵬翮浮銷十三萬  
有奇請逮治上曰河工錢糧原不限數水大所需多水小所需少如謂鵬翮以

十三萬入已必無之事河工恃用人鵬翮用人不勝事故至此耳因還世芳疏  
上南巡閱清口見黃水倒灌詰鵬翮鵬翮不能對上曰汝爲王謙輩所欺流於  
刻薄大儒持身如光風霽月况大臣爲國若徒自表廉潔於事何益上舟渡河  
閱九里岡嘉鵬翮修治如法御製詩書扇以賜及秋淮黃並漲古溝清水溝韓  
家莊並溢廷臣議奪官上命仍留任尋督塞諸處漫口四十五年疏請開鮑家  
營引河尋用通判徐光啟言擬開引河出張福口分洪澤湖異漲卽爲高家堰  
保障謂爲溜淮套鵬翮與總督阿山總漕桑額合疏請上莅視四十六年上南  
巡閱所擬引河道諭曰朕自清口至曹家廟見地勢甚高標竿錯雜依此開河  
不惟壞田產抑且毀塚墓鵬翮讀書人乃爲此殘忍事讀書何爲詰責鵬翮  
翮謝罪上以議爲阿山所主非鵬翮意削太子太保奪官仍留任四十七年以  
黃運湖河修防平穩命復官並免應追帑銀尋遷刑部尙書四十八年調戶部  
五十一年江南總督噶禮與巡撫張伯行互劾命鵬翮與總漕赫壽往按鵬翮  
等右噶禮請能伯行五十二年調吏部伯行劾布政使牟欽元赫壽時爲總督

與異議五十三年命鵬翮與副都御史阿錫鼎往按復請雪欽元議伯行罪斬事互詳伯行傳尋丁父憂以原官回籍守制服闋還朝六十年汶水旱涸阻運命往勘請疏濬坎河雞爪諸泉分注南旺而於彭口築隄障沙水入微山湖河決開州橫流至山東張秋阻運命往勘請築南旺馬場等湖隄蓄水濟運並陳引沁入運利害謂地勢西北高於東南若沁水從高直下而河躡其後害且巨測六十年世宗即位加太子太傅雍正元年授武英殿大學士河決馬營日久未塞命往勘議并塞詹家店四口濬治黃沁合流處積沙從之三年卒加少保命於定例外加祭淡堂上官科道皆會賜葬諡文端

論曰明治河諸臣推潘季馴爲最蓋借黃以濟運又借淮以刷黃固非束水攻沙不可也方輿之錫皆守其成法而輔尤以是底績輔入疏以濬下流爲第一節費不得已而議減水成龍主治海口及躬其任仍不廢減水策鵬翮承上指大通口工成入海道始暢然終不能用輔初議大舉濬治世以開中河培高家堰爲輔功孰知輔言固未盡用也